

## 1 Korint

**1-2** Anut ilon yen ak ago, nai Pol, Jesus Kristus san aposel nilasa wo igiag a. Nai, agod idsad teid Sostenis dam girek en aŋ Anut san Kris midaen a Korint na amado dan sam na miganeg ipalu ya. Anut aŋ igian go Jesus Kristus da itumanan go ijanen tamolpein gun ak alasa ya. Aŋ agod tamolpein a tan fidian lo dumado dugo, idsad Tubun ak Jesus Kristus yanjan lo dugudani dan dida, aŋsam na girek en miganeg ipalu ya. Kristus man ijaned Tubun ak, agod idsad mi a.

**3** Anut idsad Tamad agod Tubun ak Jesus Kristus, ijaned ilo panek agod ilo maror da ka dupanaŋ a.

*Pol Korint adi niŋedi wo Anut ilo uyan ru ipani a*

**4** Nai aŋ niŋemi wo nal fidian Anut ilo uyan niupani da, fun dugo, Jesus Kristus log Anut ilon ipanaŋ a.

**5** Kristus lo man Anut in dal fidian lo binawek funfun aŋ ipanaŋ a, an lo binawek ru afulale san, agod binawek maŋau amam da yak san dam aburoug binawek uraru an aŋ ilom lo ijanefute ya.

**6** Man dugo, ru a maŋ Kristus niŋen o aŋ luluŋam lo mufulale se yan nuŋon igane dugo ale ya.

**7** Fun an niŋen o idsad Tubun ak Jesus Kristus, fon kuai isi da wan niŋen o aŋ malam agane dugo, Urgun binawek ipanad dan lo ta katuk am da, tia geig a.

**8** In aŋ dabai ipanaŋ pe atur sakar yaup saen wadan idu wa, an lo idsad Tubun ak Jesus Kristus

san nal idu wan lo in aŋ mel ta niŋen o ru ta ipanaj na wa.

<sup>9</sup> Anut pempem iŋanen ru iganuri da. In an igian go iŋanen Nanun, Jesus Kristus idsad Tubun ak da atumanig nug turan igo woŋ ator da. Amaiak niŋen o in dugo ibol dan ate mi ago igane wa.

### *Korint midaŋ ilon lo biatitek yen da*

<sup>10</sup> Nai teig taog, idsad Tubun en Jesus Kristus yanjan lo ŋusumianaj da, aŋ fidian mi ilom kisaek dop aŋ luluŋam lo biatitek ta yen na wa. Nai ilog ibol dak, aŋ fidian mi ilom atumani, agod aŋanem ilo sou dam kisaek a.

<sup>11</sup> Man dugo, Kloe san tamolpein ŋaisag na dupalug, aŋ luluŋam lo nug paek kagin yen dan dubol go ŋaloŋ a.

<sup>12</sup> Nai ago ŋabol an san fun man igo ya. Aŋ luluŋam lo ta ibol, “ŋai Pol san,” ta ibol, “ŋai Apolos san,” ta ibol, “ŋai Sifas san,” agog ta ibol, “ŋai Kristus san.”

<sup>13</sup> Ak dugo, Kristus tinin gilefutek go sensen dien di? Tia, ŋai Pol, aŋ ninjemi wo aigim fo ŋamat i? Tia, ŋai yaŋag lo suguek dupanaŋ i?

<sup>14</sup> Nai Anut ilo uyan ŋupani da, man dugo, ŋai tamolpein tata ŋufulanai man tia ya, nek Krispas in Gaias da mi a.

<sup>15</sup> An lo man talpein ta ŋai yaŋag lo ŋusugui ak ago ibol san tia ya.

<sup>16</sup> Rumok, ŋai Stefanas san warou iŋanen ab lo dumado dan ŋusuguai a, ak gug an patun fo taidam ŋusuguai ak ago ilog isou man tia ya.

<sup>17</sup> Man dugo, ŋai tamolpein ŋusuguai o Kristus idinag go ta ŋupalu na ya. Tia, in ŋai bilaluŋ uyan ak ŋabol ilasa wo idinag go ŋupalu ya. Agod ru a

ŋabol ilasa na yan tamol sad kankan milaen ak lo ta ilasa na ya, agod kududod lo ru bulbal ak ŋai dida ta miŋinęj na ya. Ata wo? Ru a Kristus san aigim niŋen o tabol ilasa dan man dabai anda ya, kabelan ru sen ak ŋabol ilasa dan lo aigim san dabai an nuŋon igane ilasa san tia banau.

*Kristus inj man Anut san dabai agod kankan milaen a*

**18** Man dugo, tamolpein ensauta a dideg diau dan inj ilod lo man, aigim san ŋiŋen an ru ŋiŋeo igo woŋ a. Ak man tamolpein ensauta a Anut patud ipasi wo urat igane dan, iŋsad ilo sou lo man, aigim san ŋiŋen an Anut san dabai mok. Agod id man nek tamolpein ama ya.

**19** Ata wo? Awak aban ta Anut san buk lo yak igo ibol,

“Nai tamol a sad kankan milaen an iŋjaned maŋau  
daon ŋupani wa,  
agod kamaŋ tamol adi sad kankan uyanan an  
ŋai sen gigin na ŋigane wa.”

**20** Tamol kankan milaen ak dugon te imado di? Kubiaeŋ tamol dugon te imado di? Tan en san kamaŋ tamol ru uyan ak iŋinęj dan dugon te imado dak i? Tamol naok amaiak inj ka dubunawad ak i? An fidian tia ya, man dugo, Anut inj tan en san tamolpein iŋjaned kankan milmilae an, ru burau ak igo woŋ iganeg ilasa ya.

**21** Man dugo, Anut iŋsinan kankan milaen an lo iŋjanen ilo girek igo ya. Tan en san tamolpein iŋsinan kankan milmilae an lo Anut dulon ŋsan tia ya. Tia, Anut ilon igo ibol dak man, ru burau a maŋ

mabol ilasa na yan lo mi, tamolpein ensauta a ru an ilod lo rumok an, patud ipasi a.

<sup>22</sup> Juda adi kulob girager dile wo ilod ibol da, agod Juda tia yak adi man, kankan milaen ak aban an diabi da.

<sup>23</sup> Ak gug ru e manj mufulale den man, Kristus aigim fo imat ak san ru. Ru en Juda adi ilod lo rumok san dal ifutani da, agod Juda tia yak adi ilod lo man, ru an ru burau ago dubol da.

<sup>24</sup> Ak man tamolpein ensauta a Anut igiai an, gidad inj Juda adi, tia, inj Juda tia yak adi, inj dulonj ak, Kristus man Anut san dabai, agod kankan milaen ak dam Anut san mi a.

<sup>25</sup> Man dugo, Anut san ilo sou burau man, tamolpein sad kankan milaen an irinjani a. Agod mel dabai an tia yak Anut igane dan, tamol sad dabai irinjani a.

<sup>26</sup> Teig taog, anjsam wagiñ Anut ipanaj an ninjen o ilom isou. Tan en san tamolpein malad lo man, anj luluñjam lo manjau tutubu amad da yan wei an tia ya. Tamol tutubu yak dilasag dumado dan dam wei an tia ya. Agod tamol yanjad an da yak sad gugoi lo inj nujod wei an tia dilasa ya.

<sup>27</sup> Ak gug Anut tamolpein a aenta sad leil lo ñinjeo dubol dan ipilianaig, ate talpein a kankan milmlae an miai ipidinai a. Nek ago mi, inj tamolpein dabai ad tia yak ipilianaig, ate tamolpein dabai ad da yan miai ipidinai a.

<sup>28</sup> Taida mi, melmel a tan en lo yanjad tia yan, melmel a tamolpein patud dupidinai dak, agod melmel nek a ta dien na dan dam ipilianaig, an lo melmel a inj dien mok dan mel kawan ak igo wonj idiraig dilasa ya.

**29** An lo man, talpein ta Anut naon na sen yaŋan yabisa san tia ya.

**30** Anut iŋsen mi, ajanem madok Jesus Kristus lo yan san fun mok a. Anut lou wei mi Kristus ipanig ate id ibinawad a. Kristus lo mi id kankan milaen ak amad da tilasag tumado da. Tamol a id idad go injiliad an man Kristus mi a. Inj lo yak niŋen o Anut malan lo id itaot, agod gun tilasag tumado da.

**31** Fun an niŋen o ru ta digire yan ago ibol da, “Talpein enti kagin ta niŋen o sen yaŋan yabisa wo igane tap, gidad imoip, inj Anut mi yaŋan yabisa wa.”

## 2

### *Pol Kristus niŋen o mi ibol ilasaya*

**1** Teig taog, saen ɻai aŋsam na ɻupalug Anut san ru ɻufulale panaŋ man, ɻai kudodom lo ru bulbal ak lo ta ɻinjineŋ na ya, agod ru kankan milaen ak lo ilasa na yan lo ilom ta ɻinjane na ya.

**2** Man fun dugo, ɻai ilo sou igo ɻigane ya, saen ɻai lulunjam lo ɻumado man, ɻai ru an fidian patug fo ɻigane ya. Ru Kristus niŋen o, agod iŋsen aigim fo imat an dam, ru nek an mi ɻabol dugo aloŋ a.

**3** ɻai aŋ lulunjam lo ɻumado dugo tinig dabai an tia ya. An mi tia, ɻai ɻarer dugo tubun mi ɻusuruwor se yan dam ale ya.

**4** Taida mi, ɻaisag ru agod bilaluŋ ɻabol panaŋ an man, ilom ɻinjane san kankan milaen ak ate ta ɻabol go aloŋ na ya. Tia, aŋsem ale aloŋ ak, ɻaisag ɻinjeneŋ an Awan Urgun san dabai lo ilasa ya, man dugo, Awan Urgun iŋjanen dabai kuai tem ikubiaig ale ya.

**5** Nai ago ɳigane yan fun man, ajanem ilo rumok san fun mok an tamol adi sad kankan milaen ak lo ta yen na wa. Tia, ilo rumok an Anut san dabai lo mi yen a.

### *Kankan milaen a Urgun san na ipalu yan san ru*

**6** Ak man tamolpein a Anut nijen o ijaned maŋau milaen an luluŋad lo man, rumok, ru a miŋiŋeŋ dan kankan milaen ak lo ilasa da, amaiak dile dulonj da. Ak gug kankan an man, saen e gamu tumado den san kankan milaen ak tia geig a, agod tan en san gurman adi sad kankan milaen ak, an dam tia ya. Man dugo, Anut iŋ gurman adi saen gamu tumado den san igane itout o urat igane da.

**7** Ak man kankan milaen a maŋ kuai te migane ilasa dan man, gubak mi mianuk lo yen na ya. Kankan milaen an Anut wagam mok, saen tan en gamugo ilasa yan, iŋsinan ilo sou lo imiani a, agog saen milaen mok ante yen na ya. Man dugo, Anut fun lo mok tan gamugo ilasa dugo ilon igo yen a, mitep kankan milaen an id ipanad dop lo girager amad da tilasap tumado wa.

**8** Kankan milaen naon en man tan en san gurman adi dulonj san tia ya. Iŋ kankan milaen an dulonj mok tap, kumaen panu san Tubun ak a girager anda yan, aigim fo ta dubali na wa.

**9** Ak man ru ta gubak mi digire yan igo ibol a,  
“Melmel a tamol malad nam ta dile na yan,  
kududod ta iloŋ na yan,  
kitek ilo girek aman ta digane na yan,  
melmel an Anut ikubune lag dien da, an lo  
dop tamolpein a iŋ nijen o dumat dan ipid-inai a.”

**10** Ak man melmel nek an Anut iñsen Awan Urgun lo kuai te idirig tile ya.

Awan Urgun ij mel fidian ikubiani da, an lo iñsad bunun mok iloñ uyanan a. Iñ Anut san ilo girek nek a ilon lo kuror geig dien dan dam ikubiani fufei da.

**11** Ak dugo, tamolpein luluñad lo enti ij talpein ta san ilo sou mok ka iloñ ak i? Tia, talpein an iñsinan ur mi a. Nek ago mi, talpein ta Anut san kankan iloñ san tia ya, tia, Anut sinan Ur mi iñsan kankan ka iloñ a.

**12** Aria, ur ta tan en san id ta tiñane na ya, tia, Ur a Anut san na ipalu yan mi id tiñane ya. Anut Ur an ipanad a, an lo dop id ka binawek funfun a ij kawan ipanad amaiak taloñ uyanan a.

**13** Binawek wei mi amaiak niñen o mañ gamu minjeneñ da. Ru a tamol sad kankan milaen ak ipiteñanama dan lo mañ ta minjeneñ na da. Tia, ru a Åwan Urgun ipiteñanama dan lo mi minjeneñ da. An lo mañau nuñon a Anut kuai te igane ilasa panama yan, mañ ru Urgun ipanama yan nam san fun mok mufulale da.

**14** Talpein a Urgun ilon lo tia yan, mañau nuñon a Anut san Ur san na ipalu dan ta iñjane na da, man dugo, ij ilon lo mañau an ru burau igo woñ ak ibol da. An lo man mañau nuñon an iloñ san tia ya. Man ata wo? Mañau an san fun mok niñen o ilon itarpasi san dabai man, Awan Urgun lo mi ilasa da.

**15** Ak man talpein enti ij Anut san Urgun aman da yan, ij melmel fidian ikubianip, an lo iñaned fudi mok dam ka iloñ uyanan a. Ak gug tamol sen ta Urgun ilon lo tia yan, talpein naok an ikubiani

san ta idaisuda na ya.

<sup>16</sup> Man dugo, profet Aisaia ago ibol,  
“Ak dugo, enti Anut ilon iloŋ pe  
an lo iŋ ka maŋau ipiteŋjani wak i?”  
Ak gug id Kristus anen maŋau amad da ya, an  
niŋen o nek ibol Kristus ilon isou dak igo woŋ id  
dam ago ilod isou da.

### 3

#### *Biatitek midaen ilod lo yan san ru*

<sup>1</sup> Teig taog, saen ŋai malmalan aŋsam na ŋupalu  
yan, tamolpein Urgun san ak igo aŋ da tiŋiŋeŋ san  
tia ya. Tia, aŋ tan en san tamolpein igo woŋ, nek  
ago mi ŋai aŋ da tiŋiŋeŋ se ya. Man dugo, gidad aŋ  
Kristus lo amado bo man, aŋ nek ibol nanuk adi a  
injaned tinadi gamu geig didiraisi ak igo woŋ a.

<sup>2</sup> Fun an lo ŋai gubak mi su mi ŋupanaŋ aluk se  
ya, anaŋ dabai ak ta ŋupanaŋ na ya. Ata wo, aŋ  
anaŋ dabai ak ani san saen gamugo ilasa da. Agod  
ŋai ŋiliaŋ ak man ajanem saen gamugo da.

<sup>3</sup> Ajanem kagin ta abileksa na da, tia, aŋ tan en  
san tamolpein dida sam kagin naon kisaek a. Man  
dugo, aŋ luluŋjam lo turak susak kagin, agod nug  
paek kagin yen da. Kagin naok ago yan man tan en  
san mi a. Amaiak niŋen o aŋ tan en san tamolpein  
sad kagin naok an mi agane da.

<sup>4</sup> Man dugo, saen tamol ta aŋ luluŋjam lo ibol,  
“Nai Pol san,” ago dop ta ibol, “Nai Apolos san,”  
an lo maŋsama leil lo man aŋ nek ibol tan en san  
tamolpein atutuŋjanai oŋ da.

<sup>5</sup> Aŋ dugo ilom isou di? Apolos iŋ yaŋak anda  
yak i? Tia, ŋai Pol yaŋag anda yak i? Maŋ Anut san

urat tamol mi a. In maŋ anen anen maŋanema urat ipanama ya, agod urat a migane yan lo aŋ Kristus o ilom rumok a.

<sup>6</sup> Nai ai patun nupae dugo Apolos you ipani da, ago gug Anut iŋsen mi kaginan igane dugo isag tubun a.

<sup>7</sup> Amaiak niŋen o talpein enti ai patun ipae dan yanjan tia ya, agod talpein enti ai patun you ipani dan, in dam yanjan tia ya, ago gug talpein enti a ai patun kagin an iganeg isa dan, nek in mi yanjan an da ya, agod an nek Anut mi a.

<sup>8</sup> Tamol ai patun ipae dan, in tamol ai patun you ipani dan da, ilod kisaek a. An niŋen o urat dugo dugo in anen anen digane yan, atem Anut urat an naon ipidinai a.

<sup>9</sup> Man dugo, maŋ man Anut san urat kisaek. An man Anut san abi, agod aŋ man iŋsan ab.

### *Midaen̄ san urat tamol in ab bek igo woŋ a*

<sup>10</sup> Ilo panek e Anut n̄ai ipanag en lo man, n̄ai nek ibol ab bek tamol ikawił amag ak igo woŋ bag n̄ugunaig dutur da. Agog tamol sen ak bag an fufo ab yabi da. Ak man ab bek tamol anek anek dugo woŋ ab a diabi dan niŋen o in gidad kagin digane uyan a.

<sup>11</sup> Man dugo, talpein ta bag tamol sen ta iguni san tia ya. Tia, bag tamol n̄ai n̄uguni lag itur da. Bag tamol an man Jesus Kristus mi a.

<sup>12</sup> Talpein ta bag an fufo na gol nam, tia, silva nam, tia, pat naon lak na geig ak nam, tia, ai nam, tia, gafurfur igosan nam, tia, ai roun nam ate ab yabi tap,

<sup>13</sup> urat dugo man igane yan san bunun mok kuai isi wa. Man dugo, nal a ate Jesus imul ipalu wan

ilasa wa, an lo dop urat naok dugo yak talpein an igane yan lilaman lo ilasa wa. Urat an san bunun mok an yai lo walal te ilasa wa. Yai an tamol anen anen sad urat ibitinae a, an uyan boi, tia, saian boi, kuai te ilasa dop tile wa.

**14** Aria, talpein enti iñanen ab isuse yan yai an lo itur sakar tap, Anut talpein an iñanen urat naon itaot mok an ipani wa.

**15** Ak gug talpein ta iñanen ab yai lo inani yau tap, iñanen urat igane yan naon ta iñane na wa. Ago bo man, talpein an iñsen ta ideg na wa, tia geig a. Man dugo, Anut patun ipasi wa, nek ibol tamol ta tamol sen ak yai lo ideg o dan yabip yai lo ipasi wak igo woñ a.

### *Añ man Anut san ubou ab*

**16** Añ arjanem tinim man Anut san tempel, agod iñanen Ur ilom lo imado dan, añ ta aloñ na yak i?

**17** Talpein ta Anut san tempel malan isue tap, Anut talpein an malan isue wa. Man dugo, ab Anut lo imado dan man gun geig a, agod ab an nek añsem mi a.

### *Añ tamol niñedi wo se pitianoi kagin agane amoi*

**18** Añ sem ta irawañ na wa. Añ luluñam lo tamol ta, tan en san tamolpein dugo woñ ilod isou dak iri panim, in kankan milaen ak aman da ago ilon isou tap, in gidad iñanen ilo sou ibilisa wa. In tan en san tamolpein sad leil lo tamol burau ak igo woñ ilasa wa. An lo dop in kankan milaen ak aman da ilasap imado wa.

**19** Man dugo, Anut san leil lo man, tan en san tamolpein sad kankan milaen an ñiñeo igo woñ a. Ru ta Anut san buk lo ñaisag ñiñen ibalsiñani da,

ru an igo ibol, “Tamlolpein iñsiganek rawek kagin lo mi diau disasaug Anut ibiai a.”

<sup>20</sup> Agod fon Anut san girek ibol, “Tubun en ilon da, tamolpein kankan milaen ak amad da yan sad ilo sou man, ilo sou kawan a.”

<sup>21</sup> Fun an niñen o anj fon tamol adi niñedi wo se pitianoi kagin ta agane na wa. Tia geig a. Mel fidian man añsami la ya.

<sup>22</sup> An niñen o man, Pol, Apolos agod Pita, iñ dam nek añsami a. Tan en, tia, kumaen iñ mateñ da, an dam añsami a. Ago mi saen e lo gamu tumado den, agod saen a murnap ilasa wan dam añsami a. Rumok nuñon, mel nek en fidian añsam mi a.

<sup>23</sup> An lo añsem man Kristus san, agod Kristus dam Anut san.

## 4

### *Kristus san aposel adi*

<sup>1</sup> Amaiak niñen o anj mañ igo aliama wa. Mañ Kristus san urat tamol mi a, agod ru a gubak mi an Anut ilon lo imianuk a, gug gamu kuai te ilasa amaiak tamolpein murupidai duloñ san urat mañ banima lo iganeg, kaginan migane da.

<sup>2</sup> Aria, anj alonj ak, saen urat taman ta iñjanen urat tamol adi urat amaiak banid lo igane man, urat tamol an urat taman san leil lo urat an niñen o ta diyalis na wa, tia, iñ urat an kagin dupani uyanan a.

<sup>3</sup> Anj ñaisag urat apipi ale tap, ñai ilog ta weiwei na wa. Agod tan en san tamolpein iñjaned kot lo diginiag pe dibilitiniag tap, an dam mel kawan a, agod an lo ñai ilog ta weiwei na da. Rumok, ñai dam seg ta ibitiniag na da.

**4** Naisag urat walal te ya, agod urat njigane yan ninjen o ηaineg kankan muruan ta ipanag na da. Ago bo man ηai muruan amag tia yak ago ka ηabol san tia ya. Tia, Tubun en mi ηaineg urat ibitinaep ile wa.

**5** Amaiak ninjen o, saen gamugo dop aŋ imug mel ta bitinaek lo ta agane na wa. Tia, Tubun en imul ipalu san saen ilasa wan ninjen o atitian i gup a. Inj melmel a gamu mianuk lo dien dugo tidom tubun ituana dan, injanep idiraip kuai te ilalan lo dilasa wa, agod tamolpein sad ilo sou sed ilod lo dimianig yen dan dam injanep walal te igane wa. Saen an lo man, Anut mi tamol fidian anen anen injsad urat dugo digane na yak atem ipitiana a.

**6** Nai teig taog, ηai melmel e ninjen o ru ηinjien den lo ηai Apolos da mitilaen igo woŋ aliamawa. An lo man ηai Apolos da sama bunuma ale dan lo maŋau aŋanep an lo, ru e tamolpein dubol den san fun mok alon a. “Gidad ru dugo digire yan amaiak aŋ ta abi-riŋani na wa.” Aŋ ago agane tap, aria, aŋ urat tamol ta yanjan abisa wak gug urat tamol sen ak ta yanjan abi idu wo ago agane dan amoi.

**7** Man dugo, oŋ tamol, oŋ pein, en ata wo oŋ talpein sen ak riŋani dak ago ilo isou di? Ata mel mok e gamu oŋ tuo lo yen den, emaiak oŋ gubak mi lou panek igo woŋ ta ηane na yak i? Aria, oŋ mel an lou panek igo woŋ ηane tap, ata wo oŋ se ipitiano da, nek ibol oŋsigane dabai nam ηane yak igo woŋ i?

**8** Nag aŋ Korint tamolpein, aŋ mel fidian aŋal go idaisuda la yak boi! Nag binawek funfun a Urgun ipanaj dan ilom injanefute la yak boi! Aŋ kin adi igo woŋ alasa la ya, agod an man maŋsama binawek

lo tia yak boi! Nai ilog ibol dak aŋ kinj adi igo woŋ alasa yan rumok a. Man dugo, an lo dop maŋ aŋ da sisem kinj adi igo woŋ ka tumado wa.

<sup>9</sup> Ata wo ɿai ago ɿabol ak i? Naisag leil lo man, maŋ aposel adi nek ibol yu tamol a gugurut nam materj dile san kob diŋane yak ago mi mumado da. Aŋ aloŋ ak tamol inj yu digane itout pe dumul dop, injsad ager diŋal pe patud na dirau oŋ dida diau dop lo tamolpein dal awan ananaem dutur dan ka dil a. Agop wagai lo nug dufuni san aben ante dilasap injsed nug dufuni dop dumat a. Ru mitilaen an maŋ aposel dam tou amam yabi da. Maŋ nek mel ta senamo geig ak walal isip, an lo melmel fidian diliama san ago milasa ya, eŋel sad leil lo, agod tamol malad lo dam mi a.

<sup>10</sup> Maŋ aposel adi Kristus wagen lo burau tamol milasag mumado da, ak gug aŋsem mi Kristus lo amado dugo kankan milaen am da ya! Maŋ tamol dabai am tia yak, gug aŋ man dabai tinami a! Aŋ yanjam diabisa da, ago gug maŋ yanjam diabi idu da!

<sup>11</sup> Maŋsama madok fun lo mumadog ipalug gamu mumado den man igo ya. Maŋ anaŋ o mamat dak, you o dam mamat da, agod maŋsama biouŋ dam imasisire yau a. Maŋ panu panu mator dugo saian dupanamag tinima dam dusue ditare na ya, agod aben ta ate yaes mabal san sasau ta yen man tia ya.

<sup>12</sup> Maŋsema banima nam urat wagai migane da. Saen tamolpein dumisilanama dan, maŋ bar uyan ak mi mupidinai se ya. Saen muruan dupanama dan, muruan an misinip matur sakar se ya.

<sup>13</sup> Saen maŋ niŋema wo uf digane dan, maŋ ilo

panek ru lo mi ru naon murupidai da. Maŋ nek ibol tan en san nun samuk samuk igo ya, tia, ibol sas bod tinin te isuda yak igo ya. Tan en san tamolpein malad lo maŋ gubak mi ago mumado se ya, agod gamu man iŋsad ilo sou kisaek mi a.

<sup>14</sup> Nai ru en ago ŋigire an lo aŋ miai ŋupanaŋ o tia, tia, ŋai kududom ŋabi dugo ru kagin ŋupanaŋ da, nek ibol aŋ ŋaineg nanug murooug adi igo woŋ a.

<sup>15</sup> Gidad aŋ Kristus lo yan titianek tamol wei mi amam da ya, ago bo man, aŋ tamam wei an tia ya. Man dugo, ru uyanan a ŋurupaiaŋ go alonj an lo man, ŋai ajanem tamam Kristus lo yak igo ŋilasag ŋumado da.

<sup>16</sup> Fun an niŋen o aŋ ŋududuwaŋ da, ago dop aŋ ŋai atutuŋanag pe, aŋsam tutuŋanek tamol igo woŋ asodudunag ŋilasa wa. Ŋaisag kagin naok naok an anek anek atem agam agane wa.

<sup>17</sup> An niŋen o Timoti ŋidinig aŋsam na ipalu da, Kristus lo iŋ ŋaisag nanug igo woŋ niŋen o ŋamat da. Iŋ Tubun en san urat niŋen o ilon dabai mok a. Iŋ ka ibinawaŋ dop, imug ŋai luluŋam lo ŋumado dugo, kagin naok naok a Kristus lo ŋigane na yan ilom isou da wa. Kagin a ŋigane na yan, iŋ ru a aben fidian sad Kris midaeŋ kisaek kisaek atem ŋupiteŋanai na yan da, naon kisaek mi a.

<sup>18</sup> Aŋ aenta man sem isodudunaŋ alasa dugo ru kawan tubun mi aŋiŋen da, man dugo, aŋ ilom lo ŋai aŋsam na ta ŋupalu na wak ago abol da.

<sup>19</sup> Ak gug Tubun en ilon ago yen tap, ŋai gugurut nam aŋsam na ŋupalu wa. Saen an lo, talpein a ŋiŋen tutubun mi digane dan ŋukubianai ŋeil a. An mi tia, iŋsad dabai mok Anut san na diŋane boi an dam ŋile wa.

**20** Man dugo Anut san kagin panek ilon lo man, ḥinjen tutubu yan inj mel malan te yak tia ya, tia, mel malan te man Anut san dabai, tamol tinin lo mi yen da.

**21** Dal dugon lo ḥai aŋsam na ḥupalu wo aŋ ilom ibol di? Ak dugo, bu ḥinjanep da ḥupalu wak i? Tia, ḥai ḥupalup ilo panek kagin, agod mos kagin dam ḥukubiaip ale wo ilom abol di?

## 5

### *Teim a jeit igane dan aŋsam midaen lo akudi*

**1** Aŋ luluŋam lo aenta ru disinig ḥaisag na du-palug igo durupaiag, jeit kagin naok saian geig ak yen da. Agod gob adi luluŋad lo jeit kagin naok igo yak ta yen man tia ya. Ru ḥabol den fun igo ya, aŋ luluŋam lo tamol ta inj injsinan taman san iwon foun amaiak iřjaneg ida dien da.

**2** Aŋ an aloŋ bo man, aŋ sem ipitianan da! Gidad aŋ ilom tubun mi ipapaop amado wa. Ago dop tamol a kagin ago igane dan akudip midaen patun fo agane ilasap imado wa.

**3** Gidad ḥai aŋ siŋirem na tia yak gug ḥaisag ur aŋ da amado da. Agod ḥai tamol a kagin ago yak igane yan ḥukubiani la ya, nek ibol ḥai aŋ da tumado dak igo woŋ a.

**4** Nai ru kagin igo ḥupanaŋ da. Saen aŋ Tubun ak Jesus yanjan lo apalu atumani dop ḥai ḥaineg ur lo aŋ da tumado dop, agod Tubun ak Jesus san dabai an aŋ luluŋam lo imado man,

**5** tamol an Satan tuon lo aganep an lo injanen tinin aupasek anda yak pitinjinek injane wa. Ago

dop an lo Tubun en imul ipalu san nal lo tamol an san ur patun ipasi wa.

*Aŋ aup aupasek adi ta aganurai na wa*

**6** Aŋ sesunoi kagin agane dan man ta uyan na ya. Yis kabelan inj flawa tubun ak da you da atumanip yis an ifurak yau san urat yaup iganep anaŋ an fidian ikafut a, dugo, an ta aloŋ na i?

**7** An ninjen o aŋ gidad yis wagam ak abal yau a, an lo dop aŋ nek ibol anaŋ yis aman tia yak igo woŋ alasa wa. Aŋ nek ibol anaŋ naok ago yak igo woŋ an rumok a. Man dugo, Kristus man Anut yai digane pani an lo imat la ya, injsen mi idsad Pasova san sipsip nanun id tani san mi a.

**8** Amaiak ninjen o Pasova san soubul id kagin tupani wa. Ak man id yis wagam ak ta tani na wa, tia, yis an man ru mitilaen igo woŋ a, an siai kagin agod kagin saian geig ak dam mi a. Id soubul an san anaŋ yis aman tia yan tani wa, anaŋ an man, ru a ilon lo rawek ta yen na dan, agod kagin a idsad ilo rumok igane ilasa dan mi a.

**9** Naisag girek imug en lo ŋai aŋ igo ŋurupaianj da. Aŋ tamolpein jeit kagin tinadi ak sinjired na ta amado ator na wa.

**10** Nai tamolpein tan en lo sad madok saian ak ninjedi wo ta ŋabol na da. Tia, ŋai tamolpein naok igo amaiak ninjedi wo ilog isou da: tamolpein jeit kagin digane dak, a aenta sad melmel ninjedi wo injaned kankan mala sek mi awan isa dak, a tamol gol ak dufup sad melmel digam dak, agod a tubud sewak yanjad lo ubou dile da. Aŋ tamolpein naok ago yak abisawaip asau mi aup amado tap, aŋ tan en abisei pasik a.

**11** Nai gamu girek njigire en lo dugo ilog isou dan kuai tem njabol o da. Tamol ta inj igo ibol, inj ilo rumok tamol, ago gug injeit san kagin igane da, tia dop, inj tamol malan sakar tinan, tia dop, inj tamol tubud sewak njedwi wo ubou ile dan, tia dop, inj lukluk san tamol, tia dop, inj gumagam san, anj tamol naok ago yak ta aganuri na wak, agod dida amasip anaj ta ani na wa.

**12-13** Anj dugo ilom isou di? Naisag urat en lo tamolpein a Kris midaen patun fo dumado dan kibianek lo njidirai ak i? Tia geig a. Anut mi tamolpein naok an ikubianaip yil a. Ak man anj Kris midaen, ajsam urat man tamolpein ajsiganem midaen ilon lo an mi akubianaip eil a. Anj Anut san girek ibol ago agane, “Tamol anj luluñjam lo igane saian dan, akudip yau a.”

## 6

*Tein ijanen tein kot lo igane yan ninjen Pol ipidai da*

**1** Kagin e anj luluñjam lo yen den uyan tia ya. Saen ajsam midaen ilon lo talpein ta mel ta ninjen o ijanen turan ile saian dan, ijaneg ida diaug midaen naod na muruan an ta dukubune na ya. Tia, inj turan an ijaneg kot lo yaug gob adi banid lo iganeg kot dupani a. Kagin naok an saian geig a.

**2** Id gun adi man, murnap tan en san tamolpein bitinaek lo tidirai a, an ta alon na i? Anj tan en san tamolpein akubianaip eil a. Fun an ninjen o, enta wo anj luluñjam lo mel tusan ak akubianip nek muruan an akubune san, anj ta idaisuda na yak i?

**3** Id ejel adi dam bitinaek lo tidirai an anj ta alon na i? An ninjen o sapta taida dop id Kris idsad

maŋau idaisuda wa, an lo idsad muruan tan en san man gamu ka tukubune wak i?

<sup>4</sup> An nijen o ɿai igo ɿurupaianj, gidad tamol midaen ilon lo yanad tia yak, aŋsam muruan tan en san ka bitinaek lo diganep dukubune wa.

<sup>5</sup> ɿai ago ɿabol an lo miai ka ɿupanaŋ a. Ak dugo, aŋ luluŋjam lo tamol ta iŋanen kankan milaen ak idaisuda yan alep, lo iŋ muruan a dugo ilasa dan ka ikubune san tia, an rumok ak i?

<sup>6</sup> Tamol naok ago yan aŋane amoi a, tia, aŋsam kagin igo ya. Tein Kris ak ta iŋanen tein iŋaneg yaug kot lo igane da. An mi tia, ilod lo ta rumok na yan naod na aŋ ago agane da!

<sup>7</sup> Aŋ luluŋjam lo tein ta iŋanen tein kot lo igane dan nijen o, kagin en kuai tem ikubiai ale da, Satan aŋ ibiaŋ adu geig a. Dugo, oŋ umoi dop oŋane tei muruan ipano tap, an saian ak i? Dugo, oŋ ule funip oŋane tei oŋsa melmel igam o irawo tap, an saian ak i?

<sup>8</sup> Ak gug aŋ ago agane man amoi da. Tia, aŋsem tamolpein aenta arawaig iŋsad melmel agam o agane da, agod dal sen ak lo dam agane saian da. An mi tia, kagin en aŋanem teim Kris ak lo dam agane da!

<sup>9</sup> Tamolpein kagin sisaiak digane dan Anut san kagin panek aben lo diladu san tia ya, an ta aloŋ na yak i? Mel en nijen o aŋ sem ta irawanj na wa. Tamolpein naok igo man kumaen panu diŋane san tia ya: tamolpein jeit digane dan, tubud aenta ubou ad dile dan, a talpein sen ak iwon ida dien dan, tamol iŋ tamol mi nug iwon oŋ digane dan,

<sup>10</sup> tia, gumagam adi, gidiged adi, lukluk tamol adi, a uf digane dan, agod a rawek lo gumagam

kagin digane da. Tamolpein fidian a kagin ago digane dan, Anut san kagin panek dijanep paen na dumado san tia geig a.

<sup>11</sup> Agod aŋ aenta tamolpein naok ago yak amado se ya. Ak man aŋ suguek aŋjaneg, Anut idiraŋ go tamolpein gun ak alasa ya. Agod idsad Tubun ak Jesus Kristus yaŋan lo, agod idsad Anut iŋanen Ur lo dam, aŋ Anut malan lo man itaotam alasag amado da.

### *Jeit kagin niŋen asol au a*

<sup>12</sup> Aŋ igo abol da, “Kagin dugon niŋen o ŋamat dan ago ka ŋigane wa.” An rumok, ak man kagin fidian ta dubunawaŋ na wa. Nai dam ŋiŋeŋ ago ka ŋabol a, mel dugo ŋigane wo ilog ibol dan ka ŋigane wa. Ak man nai ŋiŋeŋ naok en ta ŋiganuri na wa, man dugo, kagin ta a saian an nai itirnag man ŋamoi a.

<sup>13</sup> Aŋ abol, “Anaŋ man tiŋaed san, ago dugo tiŋaed man anaŋ san.” Gug nai ŋurupaiaŋ da, Anut murnap tiŋaed iŋ anaŋ da sisem daon ipidinai a. Kabelan aŋ jeit kagin an mel tusan nek ibol anaŋ ani dak igo woŋ ilom isou banau. Man dugo, Anut idaned tinid man jeit kagin san, ilon ago ta yen na ya, tia, idaned tinid san biabi man, id Tubun ak san urat tiganeg tumado da. Ago dugo Tubun en idaned tinid kaginad iganeg imado da.

<sup>14</sup> Anut iŋanen dabai lo Tubun en maten lo ifufuning kumaen imasag imado da. Nek ago mi id dam ifufunad pe kumaed tumasap tumado wa.

<sup>15</sup> Aŋ tinimi anen anen man Kristus tinin san boi kisaek kisaek a, aŋ an ta aloŋ na yak i? Ago tap, nai

Kristus tinin san boi ta kisaek ɳinjanep jeit pein da ɳutuman i? Man tia geig a!

<sup>16</sup> Tamol a jeit pein da dien dan, ijaned tinidi an dutumanig kisaek a, an ta alon na yak i? Man dugo, Anut san ru lo igo ibol, “Tamol inj pein da dutumanip tinid kisaek ilasap dumado wa.”

<sup>17</sup> Ak man talpein a Tubun en da dutumani dan, ijanen ɳutun ilon lo man inj Tubun en da burbed kisaek ilasag dumado da.

<sup>18</sup> Fun an nijen o jeit kagin amoip asol au a. Ata wo? Aupasek naok aenta fidian a talpein igane dan man talpein an tinin patun fo dien da, an lo aupasek an ijanen tinin ta isue na da. Ak man inj a jeit igane dan ijanen tinin malan isue da.

<sup>19</sup> Ajanem tinimi an man Awan Urgun san aben gun a, an ta alon na yak i? Anut ijanen Ur iganeg ipalug aŋ ilom lo imado da, an nijen o aŋ tinimi an aŋsam tia ya.

<sup>20</sup> Anut nanun san mateŋ lo idad iŋiliaŋ an naon tubun mok a, an nijen o aŋ tinimi san kagin naok naok atem, Anut yaŋan abisap lak na geig asini wa.

## 7

### *Nug iwon ɳanek san piteŋanek ru*

<sup>1</sup> Girek ɳaisag na aganeg ipalu yan lo, ɳai aŋ mel ta lo ru kagin ɳupanaŋ o abol a. Malmalan mok ago abol, tamol inj pein ta iŋane nap kawan imado wa, an uyan ak i? Aria, ɳai ru naon igo ɳurupaiaŋ da. Rumok, tamol inj pein iŋane wo imoi dop man an uyan a.

<sup>2</sup> Ak man gamu aŋsam taun lo jeit kagin ilasag tubun a, an lo tamolpein wei mi kagin an lo diau

dudu da. An nijen o gidad tamol inj iwon anda wak, agod pein dam inj tamol anda wa.

<sup>3</sup> Tamol inj iwon da sisem dien dan uyan a. Tamol tinin an injsan pein ipani wak, nek ago mi pein tinin dam injsan tamol ipani wa.

<sup>4</sup> Man dugo, pein injsen tinin injsan mi man tia ya, tia, injanen tinin iwon tamol ak san. Nek ago mi tamol dam injanen tinin injsan mi tia ya, tia, injanen tinin iwon pein ak san.

<sup>5</sup> Oŋ iwo da aen o ta umoi na wa. Ak man saen oŋ gudanek gane san saen ta piliani tap, an uyan ak on iwo da awam kisaek gup ago agane wa, ak man an saen katukan mi wa. Aria, saen isuda dop man fon atumani da wa. Man dugo, kabelan oŋjane tini masak itirno dop lo Satan dal gane panip oŋ ilo injanep jeit gane banau.

<sup>6</sup> Oŋ pein ɻane wak ɻai ru dabai nam ago ta ɻurupaio na da. Tia, ak man oŋ ilo man, pein ɻane wo ibol, ɻai awok ɻupano wa.

<sup>7</sup> ɻai iwog tia ya, ago yak nijen o tamolpein ilod lo rumok dan, ɻai ɻumado dak agom dumado wo ɻamat da. Ak man fidian dal an lo ago dumado dan muruan mok a. Tamol kisaek kisaek, pein kisaek kisaek atem Anut dabai anen anen ipidinai da, talpein ta binawek naok ta injane dugo talpein sen ta binawek sen ak dam injane da.

<sup>8</sup> Aria, aŋ tamolpein a iwom tia yan, agod pein suos adi dam, sam na ru kagin en ɻurupaiaŋ da. Aŋ nek ɻai igo kawan amado dop man, an uyanan a.

<sup>9</sup> Ak man inj siganed ilodi ka ditirni san ta idaisuda na dop, gidad iwodi dusu wa. Kabelan inj tinid tubun mok imasa banau.

**10** Aŋ tamolpein iwom da yan ru kagin en ɻurupaiaŋ da. (Ru kagin en ɻaisag tia ya, tia, Tubun en ru en o wagam mi ibol ilasa la ya.) Pein ta iwon tamol ak ta mok ibisei na wa.

**11** Ak man pein an iwon tamol ak ibisei tap man, inj kawan imado yau a. Tia dop, fon imul yaup iwon tamol ak da dumado da wa. Ru kagin taidam igo ɻurupaiaŋ da, tamol dam iwon pein ak ta mok ibisei na wa.

**12** Aria, ɻai aŋ aenta ru kagin igo ɻurupaiaŋ da. (Tubun en igo ta ibol na ya, an niŋen o ɻaiseg igo ɻurupaiaŋ da.) Tamol Kris ak ta iŋanen iwon ilon rumok an tia, gug inj tamol da dumado wo ilon ibol tap, gidad pein an gob imado da, tamol an pein ta ibisei na wa.

**13** Nek ago mi pein Kris ak ta tamol gob ak da dumado da, agog inj pein da sisem dumado wo imat tap, pein an tamol ta ibisei na wa.

**14** Man dugo, Anut malan lo pein e ilon lo rumok den gun imado da, agod an iŋanen iwon tamol ak ilon lo rumok tia yan ituani da, ata wo, tamol an iŋanen iwon pein ak ilo rumok anda yan ida dutumani a. Nek ago mi, pein a ilon lo rumok tia yan, iŋanen iwon tamol ak san ilo rumok an lo man, gun ilasag imado da. Ak kagin en igo tia tap, aŋ pein tamol naom ago yan aŋanem nanuk adi inj gob sad nanuk adi igo woŋ dumado da. Ak man rumok, aŋanem nanuk adi ikok dumado dugo Anut anen muroun muroun dida dutumanig gun dumado da.

**15** Ak man onjane iwo ilon lo rumok tia yan ibisawo tap, gidad ulefunip inj ka yau a. Saen kagin naok ago ilasa dan man, onj tamol onj pein

ilo rumok a da yan ta isubano na da. Man dugo, Anut aŋ maror lo mi amado wo igiaŋ a.

<sup>16</sup> Ak dugo, oŋ pein oŋjane iwon tamol ak binawip iŋ dam ilo rumok tamol ilasa wak boi, tia wak boi, an uloŋ ak i? Agod oŋ tamol oŋjane iwon pein ak binawip lo gob sad kagin ibiseip Kristus o ilon rumok ak boi, an uloŋ ak i?

<sup>17</sup> Ak man gidad, aŋ anen anen madok naon dugo yak a Anut ipilianig ipanaj an, ate nek ago amado yau a. Man dugo, Anut aŋ anen anen madok naok anen anen atem aŋjane wo igiaŋ la ya. Ru kagin a ɻai midaeŋ fidian ilod lo ɻigansi dan man nek an mi a.

<sup>18</sup> Ak dugo, tamol ta saen Anut iwagi dan iŋjanen tinin suŋulon dutute la yak tap, an gidad imoip ago ka yen a. Tia, Anut tamol ta iwagi gug tinin suŋulon ta dutute na tap, iŋ tinin suŋulon dutute wo isumianai man imoi a.

<sup>19</sup> Tini suŋulon tutek an mel kawan a, tini suŋulon tutek tia yak dam mel kawan a. Oŋ Anut san ru kagin fidian uri pani san man mel malan te ya.

<sup>20</sup> Aria, ɻai fon ɻurupaiaŋ da, saen Anut aŋ igiaŋ man, aŋ anen anen madok naon dugo yan ate amado dan, aŋ anen anen nek ago amado yau a.

<sup>21</sup> Saen Anut igiaŋ an aŋ bigabeg amado dugo igiaŋ i? Ak man gidad, an niŋen o ilom weiwei amoi. Aŋ Anut dal ikubiai panaŋ dop aŋ tamol bigabeg tia yak igo alasa wak tap, dal an ago ka agane wa.

<sup>22</sup> Man dugo, tamol a bigabeg urat iganeg imado dugo Tubun ak iwagi an man, iŋ Tubun en san tamol kawan igo imado itor da. Nek ago mi, tamol

a kawan imado itor dugo Kristus iwagi an man, inj Kristus san tamol bigabeg urat igane san a.

<sup>23</sup> Anut aŋj idad iŋilianiŋ a, an naon man lak na geig a. An lo aŋj Kristus san mi a, an niŋen o kabelan tamol sen ak san bigabeg igo alasa banau.

<sup>24</sup> Aria, oŋjane madok kagin naok naok dugo woŋ lo mado utor dugo Anut igio yan, nek ago mi mado utor yau dop, Anut da nug turan igo woŋ ago ka amado ator a.

*Talpein a nug iwon ŋanek tia yan ru kagin irup-idai a*

<sup>25</sup> Nai gamu aŋsam sumianek tamolpein iwod tia yak lo agane dan naon ka ŋjurupaiaŋ a. Tubun en ru kagin en ŋjurupaiaŋ o ta ibol na ya. Tia, en ŋaiseg ilog nam ŋjurupaiaŋ da. Aŋ ŋaisag ru kagin ka aŋjane wa, man dugo, Tubun en inj ŋai ilon imuŋjanag go maŋjau uyanan ipanag en lo ŋubunawaŋ a.

<sup>26</sup> Saen gamu lo tumado den muruan wei mi id sinjired na ipalu yan niŋen o, ŋai ilo sou igo ŋigane da, onj iwo tia mado tap, an uyan a.

<sup>27</sup> Onj iwo ŋane la i? Ago tap, kudi dop iwo tia mado wo gane umoi. Tia, onj iwo tia mado di? Ago tap, onj iwo ta ŋane wo aban ule umoi.

<sup>28</sup> Ak man on kawan madop iwo ŋane tap, an aupasek tia ya. Agod kubakan ta iwon iŋjane tap, an dam aupasek tia ya. Gug tan en lo tamolpein a iwodi diŋjane dan muruan wei mi dile wa, an niŋen o ŋai ilog ibol dak man, muruan naok an aŋ iriŋjanaŋ a.

<sup>29</sup> Teig taog, ŋai igo ilog isou da. Tan en san saen katukan mi a. An niŋen o gamu agod nal murna san fidian, tamol ensauta a iwod da yan,

nek ibol tamol a iwod tiag dumado dak igo woŋ,  
ago dumado wa.

<sup>30</sup> A tinaŋ aru digane dan, nek ibol tamolpein a tinaŋ aru ta digane na dak igo woŋ, ago dumado wa. A ilo uyan lo dumado dan, nek ibol iŋ ilod muruan dak igo woŋ ago dumado wa. A mel ta didad diŋane dan, nek ibol mel an iŋsad tia yan niŋen o iŋ diabi yau san tia yak igo woŋ, ago dumado wa.

<sup>31</sup> Agod a tan en san melmel urat dupidinai dan, nek ibol tamolpein a tan en san mala bulbal iŋjaned bubed ta isubani na dak igo woŋ, ago dumado wa. Man ata wo? Tan e gamu tile den fidian itout o sumeik da.

<sup>32</sup> Nai aŋ ilo weiwei amam da amado wo ilog ta ibol na da. Tamol a iwon tia yan iŋ Tubun ak san urat kagin ipani da, agod dal dugon lo iŋ ka Tubun en ilo uyan ipani san niŋen o mi ilon isou da.

<sup>33</sup> Ak man tamol iwon anda man, tan en san kagin naon irae da, an niŋen o dal dugon lo iŋjanen iwon ilo uyan ipani san niŋen o ilon isou da.

<sup>34</sup> Fun an niŋen o iŋjanen ilo sou lo gilek yen da. Pein ta a iwon an tia yak ta, tia, kubakan a Tubun ak san urat kagin ipani san saen anda yak ta boi, kob ate yau o ilon ibol dak igo ya, iŋ tinin ɻutun fidian lo iŋjanen Tubun ak san ilobol iganuri wo ilon tubun mi yen da. Ak man pein a iwon anda yan iŋjanen ilo sou an senamo ya, dal dugon lo iŋjanen tamol ka ilo uyan ipani wo yaes ifuni da.

<sup>35</sup> Nai aŋ ɻusubanaŋ o ilog ta yen na da, tia, ɻubunawaŋ o ru ago ɻurupaiaŋ da. Nai ilog man, aŋ kagin uyan ak lo amado dop, ajanem tini ganei Tubun en lo man nek itaat yen a.

**36** Aria, tamol enti kubakan ta ɻien dupani an, gamugo injane dak gug, injanen ilo sou lo kagin a kubakan an lo igane dan ta uyan na dugo, kubakan an inj tamol injane wak san saen kitekan irinjani la ya, ago dugo tamol an ilon lo ikubiani ak man, kubakan an injane wak ago ilon isou tap, aria, ilon dugo ibol dan ago ka igane wa. Inj au ta ipas na da, uraru an ka nug dijanep nug iwon dumado wa.

**37** Ak man tamol an tamolpein sen ak ta disoduduni na dugo, injanen ilo sou dabaig, injanen ilo masak dam itirni fufei da, agod kubakan an ta injane na wak gug injanen ɻie panek pein igo won imado yau o ilon ibol tap, an dam uyanan a.

**38** Amaiak niŋen o tamol enti kubakan ɻien dupani an injanen iwon igo injane dan, kagin uyanan igane da. Ak man tamol enti kubakan an iwon igo injane wo imoi dan, inj dam kagin nen uyanan ak igane da.

**39** Pein a tamol anda yan, Anut san kubiaeŋ isubanig, saen injanen tamol gamugo imat dugo, insan tamol ibiseip tamol foun ak ta injane na wa. Ak man saen dumado yau nap tamol ak imat tap, pein an inj ilon yen dan ago mi tamol foun ak ka injane wa. Ak man inj tamol enti a Kristus san an mi ka injane wa.

**40** Ago gug ɻai igo ilog isou da. Pein an imoi kawan imado tap man, nen ilon uyanan a. Taida mi, ɻai igo ilog isou da, ɻai dam Anut anen Awan Ur amag da ya, an niŋen o inj ɻai ulum ag yabi dugo ɻai ru kagin en ɻurupaiaŋ a.

*Mudan a tubud sewak yai digane pidinai dan san ru*

<sup>1</sup> Aria, ɳai gamu mudan a tamolpein tubud sewak adi yai digane pidinai dan nijen o ɳabol alon a. Anj igo abol da, “Id fidian maŋau amad da ya.” Awo, id fidian talon man ru an ru rumok a. Aria, talpein a maŋau anda yan sen ipitiani wa. Ak man talpein a Anut anen tamolpein niŋedi wo ilon ipidinai dan, iŋaned ilo rumok dabai ipani wa.

<sup>2</sup> Tamol a iŋanen maŋau nijen o ikawil an ago ibol dan, niŋen naok an lo mel en kuai tem ilasag yen dugo tile da, iŋanen maŋau gamugo tubun a. An lo man maŋau naok a tamol an yabi wo Anut ilon ibol dan, an iŋ ilon lo man katukan go ago yen da.

<sup>3</sup> Ak man tamol a Anut ilon ipani dan, iŋ tamol an ilon fufei da.

<sup>4</sup> Anj gubak mi mudan a tubud sewak sad ai pat mitilaedi yai digane pidinai an ka ani san nijen o asumianag a, aria, gamu ru naon ɳurupaiaŋ da. Rumok, id fidian talon uyan ak, tubud ai pat mitilaedi man tan en lo mel nuŋon an tia ya. Taida mi id talon ak, Anut kisaek o lian iŋ mi rumok imado da.

<sup>5</sup> Mel wei mi a tamolpein “tubud” dubol dan, tan na boi, tia keit lo boi dumado dak ago tan en san tamolpein ilod lo rumok da. (Rumok, tamolpein mel wei mi “tubud” dubol da, ago dugo iŋ mel wei mi dam “tubun ak” dubol dak ago talon a.)

<sup>6</sup> Ak man gidad, id Kris adi talon man, Anut mok imado dan iŋ kisaek o lian a. Iŋ mi id Tamad, iŋ mi mel fidian idiri a, agod id ilo uyan tupani wo kumaed dumado da. Taida mi, idsad Tubun ak

kisaek mi a, an man Jesus Kristus. Injanen tuon lo mel fidian dilasag dumado da, injanen dabai lo dam id tumado yau da.

**7** Ak man maŋau naok e niŋen o ŋabol den, Kris fidian ilod lo ta yen na da. Man dugo, Kris aenta ilod isou yau dak man, tubud ai pat mitilaedi inj mel rumok ak mi a, ata wo, gubak mi inj gob adi sad tamol kagin diri se ya. Amaiaq niŋen o saen mudan a tubud sewak ai pat mitilaedi yai digane pidinai an diani man, “mudan en tubud aenta san,” ago ilod isou da. Ilod itarpasi man tia ya, an lo injaned kankan ilon lo kagin uyan ak, kagin saian ak dibiatai o muruan geig a, an niŋen o injaned kankan nun anda ilasag yen dan ago dukubiani da.

**8** Ak man anaŋ dugon tani dan niŋen o Anut ta ipitianad na wa. Id ta tani na tap, mel uyan ak ta iriŋjanad man tia ya, nek ago mi, id tani tap, mel uyan ak taidam tiŋane san tia ya.

**9** Aŋ aŋsem pilianek agane san idaisuda ya, ak man kagin agane wa, kabelan pilianek agane dan, tamol a ilod itarpasi an tia yan sad ilo rumok an apitiŋini banau.

**10** Ak dugo, talpein ta ilon ta itarpasi na yan, onj a maŋau lak na geig ama da yan, tubud ai pat mitilaedi san tempel ilon lo masig mudan wani dugo ilio yak man, inj dugo ilon isou wak i? Kagin e onj gane den lo talpein an ilon yabisap, an lo inj dam mudan a tubud sewak yai digane dupani dan yani wa.

**11** Agop onjane tei e ilon ta itarpasi na yan, onjane maŋau lak na geig ak lo onj tei an pitiŋini da, ak man

Kristus talpein nek emaiak dam ibinawi wo imata.

<sup>12</sup> Dal an lo oñane tei ilon ta itarpasi na yan san kankan malan sue da. Saen oñ muruan naok e pani den, aupasek gane da, agod Kristus lo dam aupasek gane da.

<sup>13</sup> An niñen o anañ ta e ñani den teig iganep aupasek lo yau idu tap, gidad an mudan boi, tia, anañ sen ak boi, ñai anañ naok an ñani ñamoi a. Man dugo, ñai ilog igo yen da, kagin e ñigane den lo talpein sen ak ta yau idu na wa.

## 9

*Binawek naok dugo aposel adi diñane san in idaisuda ya*

<sup>1</sup> Ak dugo, ñai seg ilog nam ñator san tia i? Dugo, ñai aposel tia yak i? Dugo, ñaiseg malag nam idsad Tubun ak Jesus ta ñile na yak i? Ak dugo, añ ilo rumok adi ñaisag urat wagai Tubun en niñen o ñigane na yan nunjon añsem mi yak, an ta ale na i?

<sup>2</sup> Añ alon uyanan ak, mel an fidian rumok a. Gidad tamolpein sen ak sad ilo sou lo ñai aposel tia ago dubol da, añ man ago abol san tia geig a. Man dugo, Tubun ak ipilianag go ñai aposel ta ñilasag ñumado yan san kob man, nek añsem mi a.

<sup>3</sup> Tamolpein a ñai bitinaek lo diginiag o ilod ibol dan, gamu ru naon igo lo seg itargiranag san ñjurupidai da.

<sup>4</sup> Mañ aposel iloma ibol tap, añ mañ pat apanamap ate madad pe mani maluk dop mu-mado wo malama ka migane wa. Binawek naok a miñane san mañ idaisuda ya.

**5** Nek ago mi, maŋ iwoma ilod lo rumok an ka maŋal pe dadi mator dop urat migane wa. Aposel aenta ago digane da, Pita ago igane dak, agod Jesus sen tein muroun dam ago digane da. Ak dugo, maŋ mi ago migane san ta idaisuda na i?

**6** Tia dugo, ɿai Banabas da, nek ibol aposel aenta igo woŋ tia ya, maŋsema mi banima nam urat migane wak ago abol di?

**7** Ak dugo, yu tamol ta inj wagai san urat igane dan, injsinan moni sen ipani dak i? Ak dugo, enti injanen abi lo ai patun ipae da, ago gup anaŋ a yani wan imoi ak i? Ak dugo, enti bilelek kagin ipidinai dan, bilelek an sad su iluk san imoi ak i?

**8** Ak dugo, dag ru milaen mi e ɿabol den, tan en san tamolpein injaned kankan lo ilasag ɿinjineŋ dak ago ilom isou dak i? Ak man Moses san kubiaeŋ an lo ru naok kisaek ibol da.

**9** Kubiaeŋ an lo ru emaiak e digireg yen da, "Saen makau wit fufo ila iso dop metmet ikak yau o ipartitale dop, oŋ makau awan ta wafutani na wa." Ak dugo, Anut ru an nam makau mi niŋen o kagin ipani dak ago ilom isou di?

**10** Dugo, id ibinawad o inj ru an irupaiad da, an rumok ak i? Awo, inj id niŋed o ilon isou se ya, an lo Moses kankan ipanig inj kubiaeŋ lo ru an igire ya. Fun ata wo Anut ago ilon isou se yak i? Talpein enti anaŋ ipae dan, agod talpein enti anaŋ nuŋon ituteg injane dan, inj sisem anaŋ naon a murnap diŋjane san niŋen o malad digane da, an mi ka diŋjane wa.

**11** Maŋ aŋ luluŋam lo kumaen panu san ai patun wei mok mupae se ya, an rumok tap, dugo, aŋ kulob an naon, tan en san melmel lo abinawama

wo malama migane dan niñen muruan ifunañ di?

<sup>12</sup> Tamol aenta aŋ luluŋjam lo iñsad urat niñen o naon diñane san idaisuda tap, binawek naon kisaek miñjane san niñen maŋ idaisuda geig a! Ru e ñjurupaian den, rumok i? Tia i? Aŋ akubianip ale wa.

Ak man maŋ gubak mi aŋ binawek naok an apanama wo ta musumianaŋ na ya. Rumok, binawek an apanama san dabai maŋ da ya, gug miñjane man mamoi a. Ata wo? Maŋ iloma man, maŋsema mi muruan fidian misini wa, an lo dop Kristus anen bilaluŋ uyan ak tamolpein murupidaip dulon̄ san dal ta mufou na wa.

<sup>13</sup> Tamol ensauta a tempel ilon lo urat digane dan, iñsad anaŋ man, anaŋ a tamolpein disinig Anut dupani wo tempel lo dupalu dan aenta diñjane da, an ta aloŋ na i? Agod a alta fo mudan dumari idu dan, iñ mudan an aenta sed niñedi wo ka disinip diani wa.

<sup>14</sup> Dal nek ago mi, Tubun en ru dabai anda yak nam igo irupaiad a, tamolpein a bilaluŋ uyan ak dufulale dan, iñaned urat naon man tamolpein a dibinawai dan dupidinai a.

<sup>15</sup> Ak man ñaineg urat naon ñiñjane man ñamoi da. Taida mi, ñaisag ru e ñigire yen igo asuti dop an lo ñaineg urat naon apanag o ta ñigire na da. Tia, kagin e ñigane den, emaiak niñen o ñai ka seg ipitianag a, an niñen o talpein ta kagin an ipasi yau o man, ñai ilog tubun geig imoi da. Man dugo, urat naon ago apanag o tap, gidad ñai ñamat gup.

<sup>16</sup> Ak man gidad, ñai ru Kristus niñen o yan tamolpein ñjurupidaip dulon̄ gup, ñai sen ka seg ipitianag san man tia geig a. Ata wo? Jesus sen ñai

ago ɳigane wo irupaiag a. Iŋ awan ɳabi wa, tia tap, muruan tubun geig ɳiŋane wa!

**17** Nai seg ilog nam injanen ru ɳabol ilasa dak ago tap, rumok, ɳaisag urat naon ɳaisag na ipalup ɳiŋane wa. Gug seg ilog nam urat an ta ɳigane na da. Tia, dugo mok ɳigane dak i? Mala nouk a saen Kristus urat en banig lo igane dugo, tinin ilon lo yen dan mi, nuŋon igane wo ɳai ago ɳigane da.

**18** Ago yan lo ɳaisag urat naon ata mel i? Saen ɳai Kristus niŋen o tamolpein naod na ɳufulale dan, naon tia kawan ɳupidinaip iŋ ka dulon a, nek an mi a. An lo dop ɳai ka dabai a lo ɳaisag urat naon ɳiŋane wan, sen gigin na ɳiganep ago ka yen a.

### *Pol man tamolpein fidian sad urat bigabeg a*

**19** Nai tamol ta san urat bigabeg tia ya, an lo seg ilog nam ɳator dugo kawan ɳumado da. Ago bo man ɳai seg iginiag tamolpein fidian sad urat bigabeg ɳilasag ɳumado da. Ata wo? Idaisuda tap, tamolpein wei geig ilod ɳiŋanep ɳaŋal pe Kristus san na mau a.

**20** Juda adi malad lo ɳai Juda tamol igo wonj ɳilasag ɳumado ya, ata wo, Juda aenta Kristus o ka ɳaŋal a. Nai Moses san kubiaeŋ paen na ta ɳumado na da, ago bo man tamolpein a Moses san kubiaeŋ paen na dumado dan ɳaŋal san niŋen o, seg iginiag go kubiaeŋ paen na ɳumado dak igo ɳilasa ya.

**21** Nek ago mi, saen ɳai gob adi dadi mumado dan, nek ibol tamol ta Moses san kubiaeŋ iŋ lo tiag imado dak igo wonj, ago ɳai ɳumado da. Ago dop an lo ɳai gob aenta ka ɳaŋal a. (Ak man ɳai Anut san kubiaeŋ ag tia yak ago ta ɳumado na da, tia,

kubiaeŋ a ɳai paen na ɳumado dan man Kristus awan aban mi a.)

<sup>22</sup> Agod tamolpein a iñaned ilo rumok dabai an tia yan malad lo, ɳai tamol naok ago yak tamolpein amaiak aenta ɳaŋal o ɳilasag ɳumado ya. Tamolpein naok sen ak fidian malad lo man, ɳai iñaned kagin anek anek ɳagam ɳiñane ya. Man ata wo? Idaisuda tap, dal fidian ɳibitinaep an lo tamolpein an aenta patud ɳupasi wa.

<sup>23</sup> Kagin en fidian bilaluŋ uyan ak fañan lo ɳigane da, ata wo, murnap bar a fidian bilaluŋ uyan amaiak idiraip dilasa wan lo ɳututou wo ilog ago yen da.

*Aŋ naon uyan ak aŋane wo tinim afunip amaspalu wa*

<sup>24</sup> Aloŋ, kukok tubun ak idu dop lo tamol fidian dumaspalu wa, ago gup tamol kisaek mi iŋ imug yaup geg fo isudap naon mel iñane wa. Nek ago mi aŋanem madok tan na yak lo, aŋ fidian tinim afunip ago ka amaspalu wa, ago dop man aŋ anek anek atem Anut naon ipanaŋ a.

<sup>25</sup> Saen tamolpein kukok an lo naon diñane wo ilod yen tap, iŋ piteñanek wagai diganep lo tinid sakar ak, aria, an lo iñsed tinid dam kagin dupani uyanan dop, tubun mi dumaspalu wa. Ago dop iŋ geg fo disudap naon diñane wa. Ak man naon an man, ai rouk igo kabunjad fo dukudi wa, agod an milaen tiap ikurŋak yau a. Ak man id Kris adi idsed tinid piteñanek uyanan tupani wa, ago dop id naon ta a pempem ikurŋak yau san tia yan tiñane wa.

<sup>26</sup> ɳai ɳaiseg tinig piteñanek uyanan ɳupani da. An lo ɳai ɳaloŋ uyan ak, ɳai tamol imaspalug dal

yapitilig yau dak igo wonj tia ya, tia, ηai nek ibol tamol ta nug dufuni dugo, banin kawan ifu yau na yak ago dam tia ya.

<sup>27</sup> Tia, ηai seg tinig en ηufuni da, an lo dop tinig en dabai ka ηupani wa. Ηai tinig en nek ibol ηaisag urat pinein igo wonj, ηai ilog ibol dan ago tinig awa yabek igane wa. Kabelan ηai tamolpein aenta Anut san ru ηufulalep dulonj gup, kukok tubun an san taman ipaiag pe ikudag ηau dop ηaineg naon ηinjane san tia banau.

## 10

### *Bitinaek funfun nijen o kagin agane*

<sup>1</sup> Teig taog, ηai ilog ibol dak aŋ mel en ilom isou a. Saen maŋanema tubum bagem fidian wagam tan kawan ak ate dutor dila duso se man, timtaen kisaek ituanaig ibargiranai se ya, agod iŋ fidian Anut iŋal go, beig igileg awan sensen yen dugo, titiŋaem dudug diau a.

<sup>2</sup> Fun an nijen o idsad ilo sou man, nek ibol id Kris suguek tiŋaneg Kristus da tutumanig tumado dak igo wonj, tubum bagema timtaen an lo, agod beig lo dam, suguek diŋane dugo, Moses da dutumanig dumado na ya.

<sup>3</sup> Saen an lo iŋ fidian sisem kumaen panu san anaŋ diani dugo,

<sup>4</sup> kumaen panu san you dam duluk se ya. Man dugo, iŋ fidian pat tubun ak a kumaen panu lo yak ipalu yan, dida tureŋ diabi na ya. Ago dugo you a pat an lo ibanai na yan lo duluk se ya. Agod pat an man nek Kristus.

<sup>5</sup> Ago bo man, Anut tamolpein an wei mi niŋedi wo ta imat se na ya. Ago tag tan kawan ak ate

dumat na yan, iñaned kisedi an gidigidad dien se ya.

<sup>6</sup> Kulob en wagam mi mok ilasa bo man, tinanou igo Anut isurnai dilasa panad dugo, id teil pe tarer a. Anut ilon man, id nek ibol iñ digane yak igo woñ tia ya, id ilod imasap kagin saiak tigane san niñen o ilod bulbal an, dal nek an lo yabituanad a.

<sup>7</sup> Tamolpein an aenta tubud sewak mitilaedi a ai pat nam digane yan naod na ubou dile se ya, gug añ ago ta agane na wa. An niñen o ru ta Anut san buk lo igo ibol, “Tanolpein dumasing diani duluk na gug, dumasa dutur go gidigidad dukok ila iso da.”

<sup>8</sup> Agod jeit kagin agane amoi. Saen an lo tamolpein aenta ago diganeg, nal an lo mi Anut tamolpein 23,000 ifug dumat a.

<sup>9</sup> Agod dam, id Anut tusoduduni dop, iñanen dabai nam mel ilod ibol ak ago igane panad o ta tigane na wa. Tamolpein an aenta Anut ago dibilitinae dugo, mot wagai ak idirai dilasag dirataig dumat a.

<sup>10</sup> Taida mi, añ añjurñur dan amoi. Tamolpein an aenta duñjurñur se ya, an lo dugo eñel ta daoñ panek san ak idug tamolpein amaiak ifug dumat a.

<sup>11</sup> Mel en fidian tamolpein an fo dilasa san fun man, tinanou naok naok amaiak id tile dop kagin tigane wa. Ru kulob a fidian niñedi wo yan buk lo wagam mi digire ya. Ata wo? Mel saiak saiak a dilasag muruan dupidinai na yan, id tusutip tile dop, kankan uyan ak dupanad a. Saen e gamu tumado den lo man, saen a lo mel fidian diau dutout an sumeik a. An niñen id kagin saiak ago yak tigane man Anut imoi a.

**12** Ago yan lo, onj utur sakar dan ago ilo isou dop man, kagin gane wa, kabelan onj udup udeg wau banau.

**13** Onj lo bitinaek fidian ilasa dan senamo geig man tia ya, tia, bitinaek naon kisaek an mi dam tamolpein fidian lo ilasa da. Anut kagin ipano wa. Onj bitinaek dugo onj lo ilasa dan ka sini san idaisuda wa. Man dugo, onjane dabai dugo woŋ ate bitinaek naok an sayani san ilon uyanan da, an ninjen o inj bitinaek ta onjane dabai an irijani san amaiak onj lo ilasa wo yabituani wa. Agod saen bitinaek ta onj lo ipalu tap, dal ta lo onj usol wau o ikubiai pano wa, an lo dop bitinaek an lo utur sakar pe mado wa.

*Anut mi ubou an ale dop tubud aenta patum apidinai*

**14** Nai turag murooug, fun an ninjen o anj tubud ai pat mitilaedi ubou ad ale amoi.

**15** Anj tamolpein kankan am da ya. An ninjen o ansem mi ru e ηjurupaiaŋ den ka akubianip ale wa.

**16** Saen id pasa tiŋjane dan, gab a tiŋjanep ninjen o Anut ilo uyan san bar tupani gup lo taluk dan man, idsad lukluk lo Kristus san dar an lo tututou da. Agod bret a tafutep taní dan man, idsad nuaen lo Kristus tinin an lo tututou da.

**17** Bret a tafutep taní dan kisaek a. Gidad id wei mi bo man, id tinid fidian Kristus tinin da tutumanig tinid kisaek tilasag tumado ya, man dugo, bret kisaek o lian an id fidian sisem taní da.

**18** Anj fon Isrel tamolpein sad kagin ilom isou. Inj Anut anan yai digane pani an wadan ka diani wa. Saen inj ago digane dop, inj sed tinidi an alta amaiak

san Anut da dutumanip kisaek dilasa wa. Aŋ alon la yak an rumok a.

**19** Ak dugo, anaj a tubud ai pat mitilaedi yai digane pidinai dan, iŋ mel tubun ak ago ŋabol dak i? Tia dugo, ai pat tubud mitilaedi man, iŋ mel rumok ak ago ŋabol di? Tia geig a.

**20** Ak man aŋ gidad mel en alon uyanan a. Saen gob adi iŋ tubud ai pat mitilaedi an yai digane pidinai dan, Anut iŋsad ubou ta iŋane na da, tia, ur saiaik saiak amaiak mi ubou an diŋane da. Amaiak niŋen o tubud ai pat mitilaedi sad ubou leil niŋen o sen alasa wa. Ajanem tinimi ur sisaiak dida atumanip kisaek mi alasa man ŋai ŋamoi geig a.

**21** Aŋ Tubun ak san gab lo, agod ur sisaiak sad gab lo dam aluk dop, muruan ta ariŋjani san tia ya. Nek ago mi, aŋ Tubun ak san tebol fo, agod ur sisaiak sad tebol fo dam atutou dop, muruan ta ariŋjani wak, an dam ago agane san tia ya.

**22** Ak dugo, idsad kagin nam Anut tiganep ilon imasap turak susak igane wak i? Tia dugo, idaned tuod iŋanen tuon iriŋjani dak i?

### *Kagin fidian agane dan, Anut ilo uyan apani wo ago agane wa*

**23** Aŋ imug igo abol, “Mel dugo niŋen o ŋamat dan ago ka ŋigane wa.” Awo, an rumok a, ak man mel a fidian ŋai ka ŋigane wan luluŋjad lo mel wei mi lou amad tia ya. Rumok, aŋ ilom ibol dak ago ka agane wa, ak man kagin an aenta ajanem ilo rumok dabai ipani san tia ya.

**24** An niŋen o ru en aganuri wa. Talpein iŋanen madok mi uyan ilasa wo urat ta igane na wa. Tia, tamolpein aenta ilo uyan ipidinai o urat igane wa.

**25** Aria, mudan a didaeñ aben na diganeg yen dan ninjen o igo ḥabol da, an ka adad pe ani wa. Ilom ta weiwei na dop kankan saian ak fidian mudan an ninjen o abal yau a. Gidad mudan naok an didaeñ tamol dugot na diñane yan, fun alon o asumianai san urat ta ipanañ na wa.

**26** Man dugo, tan en Tubun ak san, agod mel tan en lo yen den dam fidian iñsan mi a.

**27** An ninjen talpein ta igiop iñsan ab lo anañ wani wo wau dop, awan wabi wo ilo ibol tap, onj gidad iñsan anañ a ikubuneg nao na igansi an ka wani wa. Onj anañ an ninjen ilo ta weiwei dop, an tubud sewak adi sadì ak ubol pe, fun ulon o sumiaeck ta gane na wa.

**28** Ak man saen talpein ta ibol, “Mudan en tubud sewak adi yai digane pidinai a,” ago ibol tap, an wani umoi. Agop an lo onj talpein an binawi dop injanen kankan dam ta kubuli na wa.

**29** Onjane kankan kubuli wo ago ḥabol man tia ya. Onj ulon la yak, mudan an muruan ipano san tia ya. Nai mudan naok en ḥani san ninjen o igo ilog isou da: ata wo tamol sen ak kankan saian anda yan, nai isubanag pe ilog ibol dak ago ḥigane san tia yak i?

**30** Saen nai ḥunuaen dan, bubeg lo Anut o ilo uyan ru ḥupani da, an ninjen o nai kankan uyan ak amag da anañ an ḥani da. Aria, ata wo talpein ta, mel a ninjen o nai Anut ilo uyan ru ḥupani dan ninjen o uf igane panag dak i? Kagin naok an fun an tia ya.

**31** Ago yak ninjen o, onj anañ wani boi, tia, you uluk boi, tia, dugo dugo gane dan, aenta malad lo Anut injanen girager ganep tubun mi ilasa wo kagin an fidian gane wa.

**32** Gidad tamolpein ta in Juda boi, tia, Judatia boi, tia, Anut anen midaen, on mel ta ganep an lo in luluñad lo talpein kisaek ta yau idu na wa.

**33** Kulob fidian a ñigane dan lo, tamolpein fidian ilo uyan ñupidinai o ñibitinae da. Man dugo, ñaineg kumaen tan en san an kagin ñupani wo urat wagai ta ñigane na da, tia, ñaisag urat funfun lo wagai ñiganep tamolpein fidian ñibinawai o ñibitinae da.

## 11

**1** An ninjen o ñai Kristus san kagin ñagam ñiñane ya. Nek ago mi aŋ dam ñaisag kagin agam aŋane wa.

### *Kagin uyan ak ubou leil lo ya*

**2** Nai aŋ ñipitianaŋ da, man dugo, ñaisag kagin naok naok fidian aŋ pempem ilom isou da, agod piteñanek funfun a gubak mi aŋ banim lo ñidiri an aŋal go, gamu dam abiai dabai dugo, ari apani uyanan da.

**3** Nai ilog ibol dak mel en aloŋ uyanan a. Tamol fidian sad gurman man Kristus, pein san gurman man iñanen tamol, agod Kristus san gurman man Anut.

**4** An ninjen o saen tamol ta in kabuñan ituanig imado dugo gudanek igane dan, kagin an lo injsan tamol gurman Kristus miai ipani da. Nek ago mi in kabuñan ituanig imado dugo profet ru ibol ilasa dak tap, dal an lo dam Kristus miai ipani da.

**5** Agod saen pein ta in kabuñan kawan\* gudanek igane da, tia, kabuñan kawan profet ru ibol ilasa

---

\* **11:5:** Grik sad tamol kagin lo man, pein iwod ad da yan yamel misilas san ak ate kabuñad dutuani gup, malak malak lo dutor a.

dak tap, inj iwon tamol ak miai ipani da. Ago igane tap man pein an nek ibol gurman roun didawi yaup an lo

miai dupani wak igo wonj a.<sup>†</sup>

**6** An niñen o pein ta kabuñan ituani imoi tap, gidad injanen gurman roun an itute yau a. Ak man pein an gurman idawi yau an miai ifuni tap, an niñen o gidad inj kabuñan ituani wa.

**7** Tamol inj kabuñan ta ituani na wa. Man dugo, in Anut san nao ñanek tamol, agod Anut san girager ikubiai ilasa da. Ago gug pein man iwon tamol ak san girager an ikubiai ilasa da.

**8** Man dugo, Anut pein injaneg ate tamol ta igane na ya. Tia, inj tamol tinin injaneg ate pein igane ya.

**9** Agod fon, in tamol iganeg pein san binawek imado wo ago ta igane na ya. Tia, inj pein iganeg tamol san binawek igo imado da.

**10** Pein inj iwon tamol ak paen na imado da, an niñen inj kabuñan ituani pate ikubiai dile wak inj iwon tamol ak paen na imado da. Kagin ago igane dop, an lo eñel adi dam ilo uyan ipidinai a.

**11** Ak man saen id Tubun ak san dal tiri dan, pein sen kisaek mi ta itor imado na da, nek ago mi tamol dam sen kisaek mi ta itor imado na da. Tia, pein inj tamol da sisem nug dubunawip dumado wa.

**12** Man dugo, wagam mok pein inj tamol tinin aenta lo ilasa ya. Ak man gamu tamol inj pein tinin lo ilasa da. Agod pein inj tamol da sisem Anut

<sup>†</sup> **11:5:** Grik sad tamol kagin lo man, pein iwon an da yak jeit kagin igane dan, inj gurman roun didawi yau a, an lo dop pein an malak malak miai dupani wa.

banin lo dilasag dumado da, man dugo, inj mel fidian idirai a.

<sup>13</sup> Aŋ arjsem mel en abitinaep ale wa. Ak dugo, pein ta kabuŋan kawan malak malak Anut igudani tap, an uyan ak i?

<sup>14</sup> Tamolpein aenta kagin a ilod lo uyan dubol dan, an dam ago ipiteŋanad da. Man dugo, injaned ilo sou lo, tamol ta gurman roun milaen mi tap, an inſen miai ipani da.

<sup>15</sup> Ak man saen pein gurman roun milaen mi idu yau dop man, an mel ta siŋaokan san mi a. Man dugo, injanen gurman roun man, kabuŋan ituani wo Anut iganeg ipani a.

<sup>16</sup> Ak man aŋ luluŋam lo talpein ta ru kagin e ŋurupaiaŋ den niŋen maŋ da nug mupei tap, gidad talpein an mel en iloŋ uyan a, maŋ kagin naon senamo ak ta mabi na da. Agod Anut san midaen aenta fidian dam ago mi digane da.

### *Tubun ak san anaŋ tani san ru*

*Mat 26:26-29; Mak 14:22-25; Luk 22:14-20*

<sup>17</sup> Gamu ɻai ru kagin taidam ŋurupaiaŋ o da. Ak man ajanem kagin naok naok a niŋedi wo ɻabol dan niŋen o ɻai ŋupitianaŋ san tia ya. Man dugo, saen aŋ atumani man ajanem kagin saiak saiak a agane dan, kagin uyan ak agane dan iriŋjani da.

<sup>18</sup> Malmalan talpein ru naok igo irupaiag go ɻalon a. Saen aŋ midaen fidian mi apalu atumani dan, aŋ luluŋam lo gilek sensen dien da. An nag kitek rumok ago ilog rumok da.

<sup>19</sup> Mel en ɻai niŋen o ta ilog uraru na ya, pempem Anut san midaen luluŋad lo gilek aenta dilasap yen a. Man dugo, kagin naok en lo kuai tem tile

wak, enti aŋ luluŋam lo Anut ipitianai da, agod enti dam ninjen o ilon saian da.

**20** Kulob a ninjen o ɿabol dan igo ya. Saen aŋ Tubun ak san anaŋ ani wo apalug atumani man, anaŋ a ani dan Tubun ak san anaŋ mok tia ya.

**21** Man dugo, tamolpein a gamugo dupalu yan aŋ aenta ta atitianai na da, tia, aŋ anen anen aŋsiganem anaŋ silei nam anig itout a. Talpein ta anaŋ tia imado yan imatigen a, ago dop aenta lukluk tinadi a.

**22** Ak dugo, aŋ aŋsiganem ab lo ani aluk dop amado san tia i? Tia dugo, aŋ Anut san midaeŋ an mel kawan ak ilom isou di? Tia dugo, talpein a anaŋ ad tia yan miai apidinai o ilom ibol di? Nai aŋsam kagin ninjen o dugo ɿabol o? Dugo, aŋ ɿupitianaŋ o? Tia geig a!

### *Jesus in bret agod wain da iŋaneŋ megeloum ipid-inai a*

**23** Dugo dugo tiganep, pasa tani taluk san dal man ɿurupaiaŋ la ya, Tubun ak sen kagin an iku-biai panag a. Tubun ak Jesus, tidom a lo ager banid lo digane yan, bret iŋane yabig,

**24** Anut ilo uyan ru ipani la gug, yafuteg igo ibol, “Bret en ɿaineŋ tinig, nai aŋ niŋemi wo ɿiganeg idu ya. Aŋ igo agane dop nai ilom isou.”

**25** Nek ago mi, anaŋ diani itout gug gab iŋane yabig igo ibol, “Gab en man kontrak foun ɿaisag dar lo ya. Saen en aluk dop nai ilom isou.”

**26** Man dugo, saen dugo dugo aŋ bret en ani dop, gab en lo aluk dop, aŋ Tubun ak san mateŋ ninjen abol ilasa dop yaup saen in imul ipalu wa.

**27** An ninjen o man, talpein a kankan tia yak igo bret yani, tia, gab lo iluk dan, Tubun ak tinin, injanen dar an dam ninjedi wo aupasek igane da.

**28** Fun an ninjen o talpein sen ikubiani ile la gup, murna bret yanip gab lo iluk a.

**29** Man dugo, talpein ta imug ilon igirep Tubun ak tinin ta ile ilon na tap, yani iluk dan lo iñsen tinin fo muruan tubun ak igane isuda wa.

**30** An ninjen o aŋ lulujam lo tamolpein aenta dabai amad tia ya, aenta subam ifu da, agod aenta dumat la ya.

**31** Ak man id imug sed ikubianad tile tap, Kristus bitinaek lo ta idirad na wa.

**32** Gug aŋ mel en alon uyan a. Rumok, idsad Tubun ak bitinaek lo idirad dugo bu ipanad da. Ak man iŋ id kududod yabi wo ago igane da, an lo dop saen iŋ tan en san tamolpein daon ipidinai dan te id iŋ dida itumanad pe sisem ipitinjanad san tia ya.

**33** Nai teig taog, fun an ninjen o kagin igo ari wa. Saen aŋ anaŋ ani wo apalup atumani man, gidad nug atitianip sisem anaŋ ani wa.

**34** Talpein ta imatigen saian tap, gidad imug iñsinan ab lo anaŋ yani gup ipalu wa. An lo dop ajanem tumanek san nujon man, Anut ibitinian pe muruan ipanaj san tia wa.

Aria, saen n̄ai aŋsam na n̄upalu man ru kagin aenta dam n̄urupaiaŋ a.

## 12

### *Urgun lou panek iwae panad da*

**1** Nai teig taog, aŋ Awan Urgun san binawek ipanad dan ninjen o aŋaŋ man n̄ai ilog ta ibol na da.

<sup>2</sup> Aŋ aloŋ ak, saen aŋ wagam gob amado yan, anjanem tamol kagin wagam an naom diraeg an lo tubud sewak adi a awad tia yan sad ubou ale se ya. Ago yan lo ur saian saian an aŋ dinjilian go kagin uyan tia yan naon sensen dukubiai ale na ya.

<sup>3</sup> Amaiak niŋen o ŋai ŋurupaian da. Talpein ta Anut anen Urgun lo Jesus imisilani san tia ya. Nek ago mi, talpein a igo ibol dan, “Jesus inj Tubun ak,” tamol amaiak Awan Urgun lo mi injiŋen da. Man dugo, ur saiak ta ago ibol ilasa san tia ya.

<sup>4</sup> Aria, Awan Urgun tamol anen anen atem lou panek naon sensen ipidinai da. Ak man Awan Urgun e binawek en iwae pidinai den man kisaek a.

<sup>5</sup> Nek ago mi id anen anen atem dal wei mi sensen lo Tubun ak o urat ka tigane wa, ak man Tubun ak e injsan urat tigane den man kisaek a.

<sup>6</sup> Taida mi, Anut tamolpein anen anen biabi binawek naon sensen ipidinai da, ak man Anut e tamolpein fidian ilod lo binawek en idirai dilasa den man kisaek a.

<sup>7</sup> Aria, Awan Urgun tuon man id tinid ilon lo walal isi dugo tile da. Ak man inj id anen anen atem dabai naon senamo ak ipanad da, an lo man id anen anen dabai a tinjaneg tabi dan urat tupani wa, ago dop an lo id fidian sisem uyan tinjane wa.

<sup>8</sup> Urgun san dabai log, talpein ta ru kankan milaen anda yak injane dugo, Urgun naon kisaek an lo mi, talpein sen ak ru maŋau anda yak injane da.

<sup>9</sup> Ta Urgun anen dabai lo ilo rumok tubun ak injane dugo, ta Urgun kisaek mi lo subam adi ikubuniai san dabai injane da.

**10** Ta kulob girager naok naok igane san dabai injane dugo, ta profet ru ibol ilasa san dabai injane da. Ta ilon lo ur uyan ak ur saian ak itarpasai san dabai injane dugo, ta tamolpein sen ak sad muroud ru lo injenj san dabai injane da. Agod ta inj muroun ru naok ago yan ilon dugo fun ibol ilasa san dabai injane da.

**11** Lou panek emaiak fidian man Urgun kisaek mi ipanad da, agod en injsen ilon ibol dak ate mi tamol kisaek kisaek iwae pidinai da.

*Tinik kisaek mi, gug tinik san boi wei mi a*

**12** Tamol tinin kisaek a, ak man injsan njen, banin, tinin aenta dam fidian wei a. Agod tinin aenta an fidian dutumanig tinin kisaek mi ilasag yen da. Kristus dam nek ago ya.

**13** Man dugo, id fidian Ur kisaek mi nam suguek tinjaneg, an lo tutumanig tinik kisaek tilasag tumado da. Gidad id aenta Juda, tia, aenta Juda tia yak, aenta urat bigabeg adi, aenta kawan tumado tator da, Anut id fidian Urgun kisaek mi lo taluk o ipanad a.

**14** Aria, tinid boi kisaek man tia ya, tia, tinid man boi wei mi a.

**15** Ak dugo, nai nieg igo ibol, “Nai banig tia ya, an ninjen o nai tinig en san boi tia ya,” ago ibol tap, rumok, inj tinik an injanen boi mok tia i?

**16** Tia dugo, kududo dam igo ibol, “Nai malag tia ya, an ninjen o nai tinig en san boi tia ya,” ago ibol tap, rumok, inj tinin an injanen turan mok tia i?

**17** Tia, tinik an fidian malak mi tap, an ninjen o dugo woŋ ru ilon ak i? Tia, tinik an fidian kududok mi tap, dugo woŋ mumalun iwen ilon ak i?

**18** Ak man rumok, Anut iñanen ilon yen ak iri panim, tinid san boi anen anen atem iñaned abed kisaek kisaek ipidinaig dien yau a.

**19** An niñen o tinid an gigin kisaek mi yen tap, tinid an nuñon tia ya.

**20** Amaiak niñen o tinid anen boi wei mi a, ak man fidian dutumanig tinid kisaek ilasag yen da.

**21** Malad iñ banid irupei, “Nai oñ ñamoi a,” ago ibol san tia ya. Nek ago mi kabuñad dam iñ ñied irupei, “Nai oñ ñamoi a,” ago ibol san tia ya.

**22** Tia, tinid sad boi aenta a dabai an tia yak tabol dan, iñsad urat tubun geig a, an lo tinid boi boi an ta dien na tap, tinid an imat a.

**23** Tinid aenta man tile uyan san tia ya, an niñen o tamol in tinin an damag ipani da. Damag nam ibalfutani da, ago dop san leil man uyanan a. Agod tinid aenta man malak malak tile san tia ya, an niñen o iñ imiani uyanan da.

**24** Ak man talpein tinin a leil lo uyanan an iñ damag ta ipidinai na da. Man dugo, dal an lo Anut tinid sad boi fidian itumanai a, tinid sad boi a leil lo uyan tia yan, yañad tisini da.

**25** Anut kulob ago igane yan lo, gilek ta tinid lo yan ta yen na wa, an lo dop tinid sad boi fidian nug kagin dupani uyan a.

**26** Fun an niñen o saen tinin aenta an kisaek madai ile tap, tinin aenta dam muruan naon kisaek an disini wa. Agod fon talpein tinin ta kisaek niñen o ilon uyan tap, tinin aenta an fidian ilod uyan a.

**27** Aria, añ fidian man Kristus tinin, agod iñanen tinin san boi fidian man añsem mi a.

**28** An lo man tamolpein fidian Kristus san midaen ilon lo mi urat digane wa. Agod Anut urat tamol naon sensen itarpasai da. Malan te mok in aposel adi ipilianai a, agod tinin te profet adi ipilianai a. Uraru an tinin te man girek maŋau adi, an patun fo man talpein a kulob girager urat digane dan, an patun fo talpein a subam dupasi yau san dabai ad da yan, talpein a tamolpein aenta dibinawai san dabai diŋane yan, tulek tamol adi, tia, pein tulek san dabai diŋane yan, agod murna geig man, talpein a tamolpein sen ak sad muroun ru ka dininjen a, ak man ru an fun ta dulon na wa.

**29** Ak dugo, talpein Kris ak fidian aposel adi ak i? Tia, an fidian profet adi ak i? Tia, an fidian girek maŋau i? Tia, an fidian kulob girager ka digane wak i?

**30** Tia dugo, an fidian subam digane itout san dabai diŋane yak i? Tia, an fidian muroun ru sensen ak fun ta dulon na yan lo ka dininjen ak i? Tia, an fidian ru naok ago yan san fun ka dulon pe dubol ilasa wak i? Tia geig a.

**31** Bar en fidian uyanan a, ago gug aenta uyanan geig a. An ninjen o aŋ tinim ɻutum lo bar a aenta diriŋanai dan aŋal pe urat apidinai san ninjen o yaes ifunaŋ a.

### *Ilo panek an mel malan te ya*

Aria, ɻai gamu aŋ kagin dugon in uyanan geig ak agane san ɻukubiaip ale wa.

## 13

**1** Nai tamol in ejel da sad balek sensen lo ɻinjen ka ɻigane wa, ak man ɻai ilo panek ag tia yak tap, ɻai nek ibol liliŋan tubun ak tamolpein kududod

lo uyan tia yak, tia, dou ta a tamol isue saian dugo liliŋan kawan ilasa yau dak igo woŋ a.

<sup>2</sup> Nai profet ru ka ŋabol a, agod mel mianuk ak fidian fud ŋaloŋ uyan a, agod taida mi ŋai maŋau fidian amag da ya, agod ŋaisag ilo rumok lo mi ŋabol pe tan bubun ta isuk yaup asau mi itur a, ak man ŋai ilo panek amag tia yak tap, ŋai tamol kawan mi a.

<sup>3</sup> Nai ŋaisag filiag an ŋuwaep tamolpein a melmel amad tia yak dinjane wa, agod ŋai tinig en ager banid lo ŋiganep yai lo dimiriag a, ak man ŋai ilo panek amag tia tap, urat naon taidam ŋiŋane san tia ya.

<sup>4</sup> Ilo panek kagin in muruan fidian isini da, agod ilo panek kagin dam tamolpein fidian ilon imuŋjanai da. Ilo panek kagin in malan ta isi na da, sen ta ipitiani na da, agod sen yaŋan ta yabisa na da.

<sup>5</sup> Ilo panek kagin in kagin naok saian ak ta igane na da, inſen mi wo ilo sou ta igane na da, in ririan ilon imasap ta tiŋaen saian na wa, in muruan a tamolpein dupani an ta ilon isou na da.

<sup>6</sup> Ilo panek kagin san leil lo man, kagin saiak an ta bulbal na ya, tia, ru a rumok an niŋen o mi uyasusai iganep imado da.

<sup>7</sup> Ilo panek kagin man pempem aenta ibarginanai dugo, pempem ilon lo rumok da, agod pempem mala nouk imado dugo, pempem muruan lo itur sakar da.

<sup>8</sup> Ilo panek kagin pempem yen da, itout yau san tia ya. Ak man tamolpein gamu profet ru dubol ilasa bo man, murnap profet ru an itout yau a. Gamu talpein aenta tamolpein sen ak sad muroun

ru lo diñiñej dak gug fun ta dulon na da, ak man murnap kagin an itout yau a. Agod gamu aenta Urgun san dabai lo iñ mañau amad da ya, ak man murnap lou panek an itout yau a.

<sup>9</sup> Man dugo, gamu idsad mañau ta idaisuda na ya, an lo id talon ak man kitek uyan a. Taida mi, id profet ru mi kitek ka tabol ilasa wa.

<sup>10</sup> Ak man murna dop saen nal a lo mel fidian itaotan dilasap yen dan ipalu man, kagin a kitek itaot an fidian ditout diau a.

<sup>11</sup> Saen ɻai nanuk tusag man, ɻai nanuk igo woñ ñiñiñej se ya. Agod ɻai nanuk igo woñ ilo sou ñigane dugo ilog igire se ya. Ak man saen ɻai tamol tubug man, ɻai nanuk sad kagin ñigane se yan fidian patug ɻupani a.

<sup>12</sup> Gamu man id ka abaj kitek tile da, nek ibol tig siñaokan tia yak lo mitilaen kuai te ta tile na dak igo woñ a. Ak man murna dop id Anut da nug naon tupanip nug tile wa. Gamu ɻai mañau kititik amag da ya, ak man murna dop ɻaisag mañau Anut ninjen o man idaisuda wa, nek ibol Anut sen ɻai ilon uyanan ak igo woñ a.

<sup>13</sup> Ago yak ninjen o mel utol en dien diau da, ilo rumok, mala nouk, agod ilo panek. Ak gug mel utol en luluñjad lo ilo panek mi iñ malan te ya.

## 14

### *Profet ru iñ balek sensen ak da*

<sup>1</sup> Añ ilo panek san dal mi ari apani wa. Ak man añ dam urat wagai agane dop Awan Urgun san dabai lo binawek sensen ipanañ an ajanwa. Ak man mel malan te man añ Anut asumiani dop, profet ru abol ilasa san dabai ka ipanañ a.

<sup>2</sup> Man dugo, talpein ta tamolpein sen ak sad muroun ru lo injen dak gug, fun ta ilon na dan, inj tamolpein aenta ta irupidai na da, tia, inj Anut mi irupe da. Rumok, tamolpein ru an fun ta dulon na da, man dugo, injanen ur nam melmel a mianuk lo dien dan mi ibol ilasa da.

<sup>3</sup> Ak man, tamolpein ensauta a profet ru dubol ilasa dan, tamolpein aenta durupidai dulon da, an lo dop dabai dupidinaip, ilod diabisa dop didiraip bubed maror anda dumado wa.

<sup>4</sup> Talpein inj balek naon sen ak lo, ru fun ta ilon na yak lo injen dan, inj mi sen ibinawi da. Ak man talpein a iñsinan muroun ru lo profet ru ibol ilasa dan, inj midaen an fidian ibinawai dugo injaned dabai nen igane isuda yau da.

<sup>5</sup> Rumok, aŋ anen anen balek ru sensen ak lo ka anjen o ɿai ilog ibol da. Ak man gidad, ɿai ilog tubun geig ibol dak aŋ fidian ka profet ru abol ilasa wa. Talpein enti profet ru ibol ilasa dan, inj talpein a balek sensen ak ate injen dan irijani da. Ak man talpein balek sen ak lo injen dop fun dam ifulalep tamolpein kuai tem dulon tap, inj talpein a profet ru ibol ilasa dan da naon kisaek a, man dugo, inj dam midaen fidian dabai ipidinai da.

<sup>6</sup> Aria, teig taog, ɿai anjsam na ɿupalup balek ru sen ak lo mi ɿinjen dop alon tap, kagin an dugo woŋ ibinawaŋ ak i? Ak man ɿai mel ta ɿionjamin lo Anut ikubiai panag an, tia, maŋau foun ak ta, tia, profet ru ta, tia, ru ta maŋau ipitenjanan dan ɿupanaŋ tap, kagin an mi nuŋon anda ya.

<sup>7</sup> Aŋ melmel e kumaed tia en, dum boi, tia, digadug boi, lilinjan digane ilasa dan ninjedi wo ilom isou wa. Talpein inj digadug ibali saian dop

man digadug san liliŋan taloŋ uyan san tia ya, ago dop liliŋan an tamolpein ditari san uŋaoŋ ipidinai a.

<sup>8</sup> Tia, talpein ta iŋ ager san dou bilaluŋ isue wa, ak man iŋ bilaluŋ isue saian tap, enti iŋ wagai yau san tawan iganep imado wak i?

<sup>9</sup> Nek ago mi, saen oŋ balek ru fun ta uloŋ na yak lo ŋiŋeŋ tap, en dugo woŋ tamolpein oŋane ru a ubol ilasa dan fun dulooŋ ak i? Oŋane ru an nuŋon tia wa.

<sup>10</sup> Rumok, tan en lo man muroun ru wei mi dien da, ak man muroun ru fidian an lulunjađ lo ta kisaek iŋ fun an tia yak ta yen na da.

<sup>11</sup> Ago yan lo, gidad talpein ta muroun ru lo iŋiŋeŋ da, ak gug ru e ibol den fun ta ŋiŋane na tap, iŋsan leil lo ŋai nek ibol tamol gol ak igo ŋumado da, agod iŋ dam ŋaisag leil lo tamol gol ak igo woŋ imado da.

<sup>12</sup> Aŋanem tumanek lo kagin naok ago yan dam yen da. Amaiak niŋen o ŋurupaiaŋ da, aŋ fidian ilom tinim imasag, Urgun san lou panek aŋane wo ilom tubun mi ibol dan niŋen o, lou panek a aŋanem midaeŋ dibinawaip dabai ad da dumado wan mi aŋanep, tinim iŋanefute wo maeg aganep aŋane wa.

<sup>13</sup> Fun an niŋen o talpein iŋsan ŋiŋeŋ fun ta iloŋ na yak lo iŋiŋeŋ tap, gidad iŋ Anut isumiani dop ru fun iloŋ pe ibol ilasa san dabai an ipani wa.

<sup>14</sup> Man dugo, ŋai balek ru sen an fun ta ŋaloŋ na yak lo ŋugudani tap, ŋaineg ŋutug mi igudani da, ak gug ŋaineg kankan an nuŋon an tia ya.

<sup>15</sup> An niŋen o en dugo tigane wak i? Saen ta man ŋaisinag ur san ilobol fom gudanek ŋigane wa.

Agod saen ta man ɻaisinag ilo sou lo mi gudanek ɻigane wa. Nek ago mi, saen ta man ɻaisinag ur san ilobol fom bar ɻabi wa, agod saen ta man ɻaisinag ilo sou lo mi ru ɻalon ak lo bar ɻabi wa.

<sup>16</sup> Ak dugo, onj balek ru sen ak fun ta ulon na yak lo Anut yaŋan wabisa dak tap, talpein a onsa midaen lo gamugo iladu dan, onsa gudanek an dugo ibinawi wak i? Inj onsa gudanek ilon pe “rumok” ago ibol san tia ya, man dugo, gudanek a gane dan fun ilon san tia ya.

<sup>17</sup> Rumok, dag onj Anut yaŋan wabisap ilo uyan pani uyan da, ak man onj talpein en ta binawi na da.

<sup>18</sup> Nai Anut ilo uyan ru ɻupani da, man dugo, dabai a Anut ipanag an lo ɻai balek sen ak ate ɻijijen dan, dabai a aŋ kagin kisaek an mi agane wo ipanaŋ an irinjani da.

<sup>19</sup> Ak man gidad, saen ɻai tumanek lo ɻumado tap, ɻaisag ru en tamolpein aenta ipiteŋanai o ɻamat da. Fun an ninjen o gidad ɻai ru wei an tia tamolpein dulon uyan san an mi ɻufulale dop inj dulon a, kabelan balek ta lo ɻai ru wei mi ɻijijen dop inj diŋaoŋ banau.

<sup>20</sup> Teig taog, aŋ nanuk igo woŋ ilom ago isou yau dan amoi a. Aŋ nek ibol nanuk adi kagin saiak digane san ta dulon uyan na yak igo, aŋ dam kagin naok an lo ɻaoŋ am amado wa. Aŋjanem kankan lo man, aŋ nek tamol busumak igo woŋ amado.

<sup>21</sup> Aisaia san girek lo tamolpein a Anut awan duparsisali se yan niŋedi wo irupaiad da. Anut igo ibol,

“Tamolpein balek sensen diŋijen dan lo,  
agod tamolpein gol ak awad lo dam,

ŋaineq tamolpein ru ŋurupidai a.  
 Ak man gidad ŋai ago ŋigane bo man,  
 in ŋai awag ta diabi na wa.”

<sup>22</sup> An nijen o, balek sen ak tamolpein fun ta dulos na yan lo diŋiŋen dan, Anut tuon kuai tem kob ta ilo rumok adi kulob an ta ikubiai pidinai na da, tia, kulob an man tamolpein a ilod lo ta rumok na yan iŋsad mi a. Ak man, profet ru an ilo rumok an tia yak iŋsad man tia ya, tia, profet ru an ilo rumok adi iŋsad mi a.

<sup>23</sup> Amaiak nijen o, saen midaen dutumani man, tamolpein ilod lo rumok tia yak boi, tia, tamolpein maŋau tutubun tia yan boi, in tumanek lo diladu dugo, aŋsam balek lo ru fun ta dulos na yak ate aŋiŋen dop dulos tap, in ilod lo aŋ ŋiŋen burau agane dak ago dubol a.

<sup>24</sup> Ak man saen aŋ fidian profet ru abol ilasa dugo talpein ta patun fo yak aŋsam tumanek lo ipalu tap, ru fidian e ilon den ilon isue dop in kuai tem ile wak in aupasek tamol.

<sup>25</sup> Agod mel a buben ilon lo imianuk an fidian dutufulal pe walal te dien dop ile wa. An nijen o in yau idup Anut ubou an ile dop igo ibol, “Rumok, Anut aŋ da amado da!”

<sup>26</sup> Nai teig taog, gamu aŋjanem tumanek lo kagin uyanan agane san nijen igo ŋurupaiaŋ da. Aŋ anek anek atem mel ka agane wa. Tamol ta in bar injane ipalu wa, tamol ta piteŋanek ibol ilasa wa, tamol ta in Anut san na ru ilon pe tamolpein irupidai dulos a, tamol ta in balek ru fun ta ilon na yan lo injineŋ ilasa wa, agod tamol sen ak iŋsan ru an fun ibileksa da wa. Aŋ kagin nek an aŋsam midaen dabai ipidinai o mi agane wa.

<sup>27</sup> Saen aŋ luluŋjam lo tamolpein aenta ru fun ta dulon na yak lo diŋiŋeŋ tap man, gidad amoip talpein uraru boi, tia, utol boi, ago ka diŋiŋeŋ a, subuŋjan taida man tia wa. Agod iŋ sisem ta diŋiŋeŋ na wa, tia, ta imug iŋiŋeŋ yaup itout gup, tinin te ta ibol ilasap, ago iri iri wa. Taida mi, talpein sen ak iŋsad ru ibileksa san dam imado wa.

<sup>28</sup> Ak man talpein ta iŋ atna ru ibileksa san tia tap, iŋ tumanek lo ta diŋiŋeŋ na wa. In Anut da ka diŋiŋeŋ ak, agod nek iŋsed ilod lo mi diŋiŋeŋ a.

<sup>29</sup> Aria, saen profet adi midaeŋ durupidai dop man iŋ uraru boi, tia, utol boi ago diŋiŋeŋ a. Ago dop tamolpein aenta man kududod mi dugurep ru dubol ilasa dan dukubianip dile uyan a.

<sup>30</sup> Ak man saen Anut ŋiŋeŋ ta tamol siŋire na yan ikubiai panip ibol ilasa tap, talpein a imug iŋiŋeŋ an imoip awan itau kisaek oŋ dop, tamol neinta an ka iŋiŋeŋ ilasa wa.

<sup>31</sup> Man dugo, aŋ fidian ka profet ru abol ilasa wa, ak man kisaek imug iŋiŋeŋ itout gup, fon sen ta iŋiŋeŋ da wa. Dal en lo ajanem tamolpein fidian piteŋjanek uyanan diŋane dop, bubed yabisap dumado wa.

<sup>32</sup> Kabelan aŋ ilom lo tamol Anut awan ilon dan ririan ru ibol ilasa dak ago abol banau, ago tia ya. Man dugo, Anut anen profet adi dabai ipidinai an lo iŋsed ŋutudi ka ditirni wa. An niŋen o iŋ Anut awan dulon an ilod lo yen yaup iŋaned saen ilasa dan te gup, ru an tumanek lo dubol ilasa wa.

<sup>33</sup> Man dugo, Anut man iŋ suŋuŋek san Anut tia ya, tia, iŋ maror san mi a.

<sup>34</sup> Aŋsam tumanek lo pein ŋiŋeŋ ta digane na wa. Man dugo, kagin naok ago yak panu panu midaeŋ

aenta lo ago digane yau da. Maŋ injum tumanek lo dijnjen man mamoi a. An nijen o nek ibol kubiaeŋ ibol ak ago, injum iwod tamol ak paed na mi dumado wa.

<sup>35</sup> Agod injum mel ta nijen o dumat pe dusumiai tap, injum dumul ab lo diau gup iwod tamol ak dusumianai dop ru an fun durupidaip dulonj a. Man dugo, saen pein ta tumanek lo malak malak injen tap, injen miai ipani da.

<sup>36</sup> Ak dugo, ajanem tumanek injum aben a dugon te Anut san ru imug ilasa ya, an rumok ak i? Tia dugo, Anut san ru panu panu aenta lo ta yau na ya, tia, aŋsam na mi yau a, an rumok ak i?

<sup>37</sup> Talpein ta injum ilon lo injen profet ak ibol, tia, injum ilon lo Awan Urgun lo bar dabai ak injane ibol tap, injum gidad mel en ile ilonj pe ilon kisaek a, ru e njaŋ njigireg aŋsam na njiganep ipalu wo den man Tubun ak awan njigire da.

<sup>38</sup> Ak man talpein an ru e njigire den nijen o ikikai tap, an nijen o saen injen injen man aŋ kududom ta agure na wa.

<sup>39</sup> Aria, mel en nijen o njaŋ ru wadan njurupaiaŋ da. Aŋ ilom tinim imasap profet ru abol ilasa wan nijen o tubun mi amat a. Agod tamolpein aenta balek ru fun ta dulonj na dan lo dijnjen san aŋ ta apadau na wa.

<sup>40</sup> Ak man mel fidian agane dan aŋ kagin itaot agod kagin uyanan ak lo mi agane wa.

## 15

### *Kristus imat go fon kumaen imasa daya*

<sup>1</sup> Njaŋ teig taog, gamu njaŋ bilalunj uyan ak e imug njabol alonj en nijen ilo sou njupanaŋ o njamat da.

Bilalun uyan en aŋ banim afulaleg aŋane dugo bag an fufo aŋanem madok Kris ak aganeg dabai anda yen da.

<sup>2</sup> Aŋ ru a gubak mi ŋufulale panaŋ an mi abi sakar tap, bilalun uyan en lo Anut patum ipasip iniliaŋ a. Aŋ ru an fidian abi yau dak i? Tia dop, aŋanem ilo rumok an kawan a.

<sup>3</sup> Mel fidian ŋai kududog ilor an ŋaisag leil lo malan te ya, an niŋen o ŋai mel tutubu yan fidian aŋ ŋurupaiaŋ a. Nai igo ŋabol a. Ru ta Anut san buk lo yen dan iri panim, Kristus idsad aupasek isuas o imat a.

<sup>4</sup> Agog iŋ disareg nal utol yau gug fon Anut mateŋ lo ifufuni yabisag kumaen ilasa da ya. Agod an dam ru ta Anut san buk lo yen dan iri panim nuŋon ilasa ya.

<sup>5</sup> Agog malmalan Pita naon na walal isi a, agog tinin te megeloum 12 an naod na dam kuai tem ilasa ya.

<sup>6</sup> Agog murna iŋ fon walal isig malak malak dile ya, atna ilo rumok adi iŋ dile yan sad sutek 500 iriŋani a. Tamol a iŋ dile yan kisaek kisaek dumat la ya, ak man wei mi gamu dumado yau da.

<sup>7</sup> Murnag Jems san na ilasa ya, agog fon aposel fidian sad na dam ilasa ya.

<sup>8</sup> Agog murna geig man ŋaisag na ilasa ya. Nai man nek ibol nanuk foun gamugo dugo tinan ririan igansi ak igo woŋ a, ago bo man Jesus sen ikubiai ŋile ya.

<sup>9</sup> Man dugo, ŋai Kristus san aposel aenta luluŋad lo yaŋag tia ya, agod ŋai yaŋag aposel dubol dan ta idaisuda na ya. Man dugo, ŋai Anut anen

tamolpein ɳusubanai o ɳukudai dugo muruan wei mi ɳupidinai se ya.

<sup>10</sup> Ak man Anut san ilo muɳjanek log gamu ɳai injsan urat tamol mok ɳumado da. Agod taida mi, injsan ilo muɳjanek ɳai ipanag an nujon ifu a, man dugo, ɳai urat wagai geig ɳigane se ya, an nijen o ɳaisag urat wagai ɳigane dan aposel aenta fidian sad urat irinjani a. Ak man ɳai seg kisaek urat ta ɳigane se na ya, tia, Anut in ɳai da ya, injanen ilo panek an ɳai urat ɳigane wo dabai ipanag se ya.

<sup>11</sup> Aria, gidad ɳai ru ɳurupaian go aloŋ se ya, tia, aposel aenta ru dubol go aloŋ se ya, ru a maŋ fidian murupaian go alon se yan naon kisaek mi ya, agod ru en nijen o mi aŋ gubak mi ilom lo rumok a.

### *Tamolpein afon kumaed dumasa wak san ru*

<sup>12</sup> Aria, maŋ Kristus mateŋ lo fon kumaen imasa da yan murupaian se yan rumok tap, en ata wo aŋ lulunjam lo tamolpein aenta, tamolpein a dumat la yan in fon kumaed dumasa san tia dubol dak i?

<sup>13</sup> Kududom agure uyanan a. Tamolpein a dumat la yan fon kumaed dumasa san tia yak abol man, an nijen o Kristus dam kumaen ta imasa na ya.

<sup>14</sup> Ago yak nijen o, Kristus fon kumaen ta imasa na yak man, maŋsama ru mufulale panaŋ se yan kawan a, agod arjanem ilo rumok an dam kawan a.

<sup>15</sup> An lo man, taida mi ru a gubak mi Anut nijen o mabol se yan ru sewak mi a. Fun an nijen o Anut malan lo maŋ sewak tamol mi a, man dugo, maŋ gubak mi malak malak ru igo mabol ilasa se ya, Anut mi Kristus mateŋ lo ifufunig fon imasag

gamu kumaen imado da. Gug tamolpein a dumat la yan fon kumaed dumasa san tia ya, an rumok tap, aria, Anut Kristus ta ifufunig fon kumaen imasa na ya.

<sup>16</sup> Man dugo, nek ibol ɿai gubak mi ɿurupaian ak ago, Anut tamolpein dumat la yan, fon kumaed ta idirai dilasa na dak man, inj Kristus dam mateŋ lo ta injane imul na ya.

<sup>17</sup> Aria, Kristus fon ta kumaen imasa na yan lo man, ajanem ilo rumok an kawan a, ago tag Anut ajanem aupasek ta ipare idu na ya. An lo murnap aŋ adeg au a.

<sup>18</sup> Taida mi, tamolpein a Kristus ilod lo rumok go dumat la yan, inj dam dideg diau a.

<sup>19</sup> Fun an niŋen o ɿai igo ɿurupaian da. Idsad mala nouk Kristus lo yan tan en lo mi ka ibinawad a, an rumok tap, man id buraurau geig a. An lo man tan en san tamolpein, rumok, tamolpein aenta ilod kitek imuŋanai a, ak man id niŋed o mi ilod tubun geig imuŋanad a.

<sup>20</sup> Ak man Anut Kristus ifufunig yabisag fon kumaen imado dak, an ru rumok a. Kristus inj malmalan mateŋ lo kumaen imasa ya, kulob an lo idsad mala nouk an, tamolpein a gamu maten lo ɿioŋ diabi dan murnap fon dumasap kumaed dumado wan, nuŋon ilasa wa.

<sup>21</sup> Nek ibol tamol kisaek mi lo mateŋ ilasa yak ago, tamol kisaek mi lo dam tamolpein a dumat la yan fon kumaed dumasa da wa.

<sup>22</sup> Id fidian man Adam malan kubulan, an niŋen o id fidian tamat a. Nek ago mi, tamolpein a fidian Kristus lo dumado dan, Anut murnap ifufunaip

fon kumaed dumasa da wa.

<sup>23</sup> Ak man id anen anen atem idsad saen lo mi a. Kristus sen malmalan imasa la ya, agog in patun fo, saen afon tan en lo imul ipalu dan, tamolpein a iñsan an fidian fon kumaed dumasa da wa.

<sup>24</sup> Murna gup saen wadan ipalu wa. Ak man saen an gamugo dop Kristus tamol gurman fidian, tamol yañad anda yak, agod dabai funfun an fidian in ibiai dudu dop in abed iñane wa. Agod wadan geig man in iñsan tamolpein injal pe Taman Anut banin lo idirai a, ago dop Kristus sen iñjaned gurman imado wa.

<sup>25</sup> Man dugo, Kristus mi tan en lo kinj imadop yaup, Anut Kristus san ager an fidian ibiai dudu Kristus ñien paen na\* dumado wa.

<sup>26</sup> Ager wadan Anut yabi idu man mateñ.

<sup>27</sup> Aria, rumok, Anut san ru igo ibol, “Anut mel fidian idiraig nanun ñien paen na dien a.” Ak man ru an ago ibol bo man, id ilod itarpasi ak, ru an Anut enti mel fidian idiraig nanun ñien paen na dien an dam ituani man tia ya.

<sup>28</sup> Tia, saen Anut mel fidian Kristus paen na idiri itout gup man Kristus sen Taman Anut paen na imado wa. Saen an lo Anut iñsen mi malan te geig a, in mi mel fidian sad tamad imado wa.

<sup>29</sup> Aria, tamolpein dumat la yan fon kumaen ta dumasa na wa, an rumok tap, tamolpein a talpein dumat la yan fanjan lo suguek diñane dan, ninjedi wo dugo tabol ak i? Tamolpein dumat la yak fon

---

\* <sup>15:25:</sup> Wagam na saen tamol gurman wagai lo iñjanen ager tamol aenta ibiai idu dop man, saen in sia kinj fo imasi dan te, iñsan ager gurman an ñien paen na imadog itokubol go ago yen a.

kumaen dumado san tia ya, an rumok tap, aria, ata wo tamolpein sen ak iŋ faŋan lo suguek diŋane dak i?

<sup>30</sup> Agod aŋ manj aposel adi niŋema wo ilom isou wa. Ata wo nal fidian lo manjsema iginiamama yai ided lo mau dak i?

<sup>31</sup> Teig taog, nai idsad Tubun ak Jesus Kristus lo ŋumado dugo aŋ yaŋam ŋisini da. Aria, ru an ru rumok ago tap, ru en dam ru rumok a, nai nal fidian ŋamat da.

<sup>32</sup> Nai etna Efesas na tamol wei mi bor kasik igo woŋ dida nug mabi se ya. An tan en san mel mi ago tap, an dugo woŋ nai ibinawag ak i? Tamolpein dumat la yak fon kumaen ta dumasa na wa, an rumok tap, gidad nai ka Anut ilog iŋaoŋ pe igo ŋabol a,

“Id gamu anaŋ mi tani taluk dop tumado wa,  
man dugo, gabulop id tamat a.”

<sup>33</sup> Aŋ sem irawan amoi, saen aŋ tamolpein sad madok uyan tia yak dida ator tap, iŋ aŋanem kagin uyan an dusuŋunj wa.

<sup>34</sup> Malam ipuk, aŋanem kankan akubunep afon aupasek ta agane na wa. Nai itaot ŋurupaiaŋ da, aŋ aenta Anut aŋaoŋ da, an aŋanem miai.

### *Murnap id tinid naon dugo tiŋane wak i?*

<sup>35</sup> Aria, tamol ta isumiaeŋ pe ibol, “Tamolpein dal dugo woŋ kumaed fon dumasa wak i? Agod tinid naon dugo yak diŋanep ate dupalu wak i?”

<sup>36</sup> Oŋ tamol buraurau! Oŋ uloŋ ak, oŋ mel patun pae dop man an ririan ta isa kisaek oŋ na wa. Tia, mel patun an imat gup a. Ago dop mel patun igo woŋ yen yau san tia ya, tia, mel patun an sen tinin ibilisa dop anaŋ foun ak igo woŋ isa wa.

<sup>37</sup> Agod mel patun a oñ pae dan, murnap nuñon ago mi ñane san tia ya. Tia, oñ wit kubulan boi, tia, mel ta patun mi pae da.

<sup>38</sup> Ago gug Anut iñsinan ilon gubak mi dugo yen ak lo mi, mel an patun iganep isa yaup tubun pe, iñaned naod sensen atem itaot dilasa wa. Mel patun an tinid naon sensen ipidinai da.

<sup>39</sup> Mudan fidian tan en lo yan naon kisaek man tia ya. Tamolpein tinid man senamo ya, bor goun sad tinid dam senamo ya, agod anakanak in iy da tinidi sensen a.

<sup>40</sup> Mel a keit fufo dien dan tinid muroun anda ya, agod melmel a tan na dumado dan dam tinid muroun anda ya. Ak man mel tan na dumado dan sad girager naon kisaek a, agod mel lak na dien dan sad girager naon senamo ya.

<sup>41</sup> Ad man iñanen girager naon kisaek a, ago gug kalam iñanen girager naon senamo ya, patui dam sad girager naon senamo ya. Agod patui anen anen sad girager an sensen a.

<sup>42</sup> Aria, saen tamolpein a dumat la yan fon kumaed dumasa wan, kulob naon nek ago yan ilasa wa. Tinid e imug tan na id tiñane emaiak tisarep igan a. Tinid foun ak a murnap tiñane wan in fon igan san tia ya.

<sup>43</sup> Tinik tan en san iñanen leil lo man siñaokan tia ya, gug tinik murna san man siñaokan geig a. Tinik tan en san in dabai an tia ya, gug tinik murna san man dabai anda wa.

<sup>44</sup> Gamu id tinid man tan en san mi a, ak man saen fon kumaen tumasa da wan, id kumaen panu anen tinik tiñane wa.

Tan en san tinik yen da, an rumok tap, kumaen

panu san tinik dam yen da.

<sup>45</sup> Fun an ninjen o Anut san buk lo igo digire ya, "Tamol a imug mi ilasa yan, Adam, inj tamol kumaen ak ago ilasag imado se ya." Ak man Adam a murna geig amaiak, sen tinin ibileksag ur ilasag imado dugo, kumaen yen yau san ipanad da.

<sup>46</sup> Kumaen panu san tinik imug ipalu man tia ya, tia, tinik tan en san mi malmalan ilasa ya. Ago gup tinik kumaen panu san ka tiñane wa.

<sup>47</sup> Tamol a malan te geig ilasa yan, inj tinin man tan gufgaf san mi a. Tamol a murna ilasa yan, inj tamol kumaen panu san mi a.

<sup>48</sup> Tamolpein a gamu tan na dumado dan, nek ibol tamol a imug mi tan na ilasa yak igo wonj ago dumado da. Nek ago mi, tamolpein a murnap kumaen panu na dumado wan, nek ibol tamol a kumaen panu na ipalu la yak igo wonj, dilasap dumado wa.

<sup>49</sup> Gamu id tinid san leil man nek ibol tamol a imug mi tan na ilasa yan san leil igo wonj a. Ak man murnap, tamol a kumaen panu na ipalu wan, injanen leil dugo yen dak ago, idaned leil foun an dam naon kisaek mi wa.

<sup>50</sup> Teig taog, ñai ñjurupaian da, tan en san tinid man Anut san kagin panek aben lo imado san tia ya, agod mel ta imat san, mel ta imat san tia yak injanep yabi san ta idaisuda na ya, tia geig a.

<sup>51</sup> Kududom agurep ñai ru mianuk ta ñjurupaian o da. Id aenta ta tamat na wa, ak man id fidian tinid ibileksa wa.

<sup>52</sup> Mala ipuk ikilakil dan lo, mel en ilasa kisaek onj a. Saen tour murna geig an ibob dop, mel an ilasa wa. Man dugo, tour ibob pe tamolpein a

dumat la yan kumaen dumasa wa, agod iñaned tinidi fon imat pe igan san tia ya. Ago dop id a tan na kumaen tumado dan tinid ibileksa kisaek oñ a.

<sup>53</sup> Man dugo, nek ibol id kulos foun ak tiñanep tidiri dak igo woñ, idsad tinid an ibileksap tinid foun ak imat pe igan san tia yan tiñane wa. Man dugo, mel a imat san an itout yau a, ago dop mel a itout yau san tia yan ilasap pempem yen yau a.

<sup>54</sup> Saen idsad tinid foun ak ago ilasa dop man, awak aban Anut san buk lo yen dan nuñon ilasa wa. “Anut yu igane itout a, kulob an san dabai man mateñ ituñali pasik a.”

<sup>55</sup> An niñen o id ka igo tabol,  
“O mateñ, oñ yu gane itout an san dabai dugon te  
yen dak i?

O mateñ, oñane buroi an dugon te yen dak i?”

<sup>56</sup> Mateñ anen buroi man aupasek mi a, agod aupasek san dabai man Moses san kubiaeñ lo yen da.

<sup>57</sup> Ak man id Anut ilo uyan ru tupani wa! Man dugo, iñ idsad Tubun ak Jesus Kristus lo idirad go yu tigane itout a, an lo man mel an fidian sad dabai tibiai dudu ya.

<sup>58</sup> Teig taog, fun an niñen o ajanem ilo rumok lo atur sakar a. Mel ta idiraj pe ta asuk amul na wa. Añ pempem añsem ilom tinim fidian lo urat agane wo dan Tubun ak apani wa. Man dugo, añ alon ak ajanem urat wagai agane dan nuñon ta ideg yau san tia ya.

## 16

*Korint adi Jerusalem tamolpein o moni dutu-maní san ru*

**1** Gamu n̄ai aŋ moni atumanip Anut anen tamolpein Judea na dumado dan abinawai san ninjen o ŋjurupaiaŋ da. Nek ibol n̄ai midaeŋ Galesia tan lo dumado dan ŋjurupidai ago mi aŋ dam ago agane wo ŋjurupaiaŋ da.

**2** Ubou kisaek kisaek atem aŋsam urat naon moni an aenta sen gigin na adirip yen a. Tubun mi ŋjane dop tubun mi pani wa, kabelan ŋjane dop kabelan pani wa. Ago dop man saen n̄ai ŋjupalu dan te dop, aŋ fon moni o urat wagai ta agane na wa.

**3** Agod taida mi, aŋ tamol aenta fudi aloŋ uyan ak apilianai a, agod saen n̄ai aŋsam na ŋjupalu dan te gup, aŋsam binawek moni agane yan disinip Jerusalem na diau a. N̄ai atna Korint na ŋjupalu gup, tamol Jerusalem na diau an, girek banid te tiganep disini diaup, matu gurman Jerusalem na yan, aŋsam binawek agane yan fun irupidaip dulonj a.

**4** Go ŋaiseg dam n̄au wo ilog ibol tap man tamol an n̄ai luag disap mau a.

### *Pol ru kagin funfun Korint adi irupidai a*

**5** N̄ai Masedonia tan lo ŋaup ŋamul gup, afon aŋsam na ŋjupalu wo ilog yen da. N̄ai Masedonia na saen milaen ta ŋumado na wa.

**6** Agod saen n̄ai aŋsam na ŋjupalu dan, n̄ai dap saen kitek milaen mi aŋ da tumado wa. N̄ai tim tubun ipalu dan san saen lo tumado yaup tim itout ak boi. An lo saen idaisudap n̄ai aben dugon te n̄au o ŋjupiliani dan, binawek an ta n̄ai onte n̄au san ka apanag a.

**7** N̄ai gamu aŋsam na ŋupalup ŋjiliaŋ o ilog ta ibol da, man dugo, n̄ai aŋ da saen katukan mi

ka tumado wa. Ak man Tubun ak ilon ibol tap, murnap ɳai aŋ da kitek saen milaen mi tumado wa.

<sup>8</sup> Gug gamu man ɳai igo Efesas na ɳumado yaup Judea lo Pentikos san tumanek nal ilasa wa.

<sup>9</sup> Man dugo, Anut ɳai dalawan ipasi panag an lo, ɳai iŋanen urat ka ɳigane uyanan mok a. Ago dugo ager tamol adi dam ɳaisag urat dututep itout o wagai digane da.

<sup>10</sup> Aria, saen Timoti aŋsam na ipalu tap, iŋ kagin apani uyan a, ago dop iŋ ata mel ta lo katukan dop, an niŋen ilon ta weiwei na wa. Man dugo, iŋ dam Tubun ak san urat nek ɳai ɳigane dak ago mi igane da.

<sup>11</sup> An niŋen o aŋ luluŋam lo talpein ta Timoti iŋane wo ta imoi na wa. Iŋ abinawi uyan ak, agop maror lo mi aganep ɳaisag na ipalu da wa. Man dugo, ɳai iŋ malan ɳiganeg ɳumado da, agod iŋsan urat kisaek adi iŋ luan disag dida dutor dan dam malad ɳiganeg ɳumado da.

<sup>12</sup> Aria, ɳai gamu idsad teid Apolos niŋen ɳabol da. ɳai iŋ aŋsam na turan aenta luad isap dida dupalu wo ɳusumiani a, ak man iŋ imoi a. Murnap iŋsen nal ta kawan ak ile dugup ipalu wo ibol a.

<sup>13</sup> Tawan ɳaganep amado wa. Ago dop aŋanem ilo rumok Kristus lo yan mi lo atur sakar a. Ilom dabai anda amado dop dabai lo mi tamol mok amado wa.

<sup>14</sup> Urat biabi fidian agane dan ilo panek lo mi agane wa.

<sup>15</sup> Aria, aŋ alon ak tamolpein a Stefanas san ab lo dumado dan, iŋ distrik Akaia ilon lo malmalan

ilod lo rumok a. Iŋ iŋsed ilod nam Anut san tamolpein dabinawaig urat digane da.

<sup>16</sup> Teig taog, fun an niŋen ŋai ŋjududuwaŋ da, aŋ tamol naok ago yan awad paen na amado wa Nek ago mi aŋjanem urat kisaek a fidian urat awan disini wo maeg digane dan dam awad paen na amado wa.

<sup>17</sup> Gamu saen en ŋai ilog uyanan da, man dugo, Stefanas in Fotunatas da agod Akaikas ŋaisag na dupalu ya. Gidad aŋ naom tia ya, an lo iŋ naom diŋjaneg ŋai ilog diabisa ya.

<sup>18</sup> Tamol en ŋai ilo maror dupanag a, agod aŋ dam dal nek ago mi dabinawaŋ a. Fun an niŋen o tamol naok ago yan, aŋ yaŋad lak na asini san idaisuda ya.

### *Ru wadan*

<sup>19</sup> Aria, midaeŋ a distrik Esia ilon lo dumado dan fidian aŋ ilo uyan dupanaŋ da. Akwila iŋ Prisila da Tubun ak yaŋan lo aŋ dam ilo uyan dupanaŋ da. Nek ago mi midaeŋ a iŋsad ab lo dutumanig dumado dan, aŋ ilo uyan dupanaŋ da.

<sup>20</sup> Ilo rumok adi etna Efesas na dumado den, aŋ ilo uyan dupanaŋ da. Saen aŋ nug ale dop man, musuk gun ak nam nug ilo uyan apani wa.

<sup>21</sup> Nai Pol, gamu ŋaiseg banig nam ilo uyan ru en ŋigireg aŋsam na ŋiganeg ipalu ya.

<sup>22</sup> Aŋ luluŋam lo talpein ta Tubun ak niŋen o ta imat na tap, Tubun en talpein an tinin fo misilanek iganep yen ak ago ŋabol da. O Tubun en, on palu!

<sup>23</sup> Tubun en Jesus iŋjanen ilo panek aŋ da amado.

**24** Jesus Kristus yaŋan lo ɳaisag ilo panek aŋ fidian ɳupanaŋ da. Rumok.

**Anut san bilalunj foun  
The New Testament in the Takia Language of Papua  
New Guinea  
Nupela Testamen long tokples Takia long Niugini**

Copyright © 1999 The Bible Society of Papua New Guinea

® Faith Comes by Hearing

Language: Takia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

---

PDF generated using Haiola and XeLaTeX on 18 Mar 2025 from source files dated 31 Aug 2023

757b3e4e-2023-5b45-893a-ee9294ddeb9d